



Алхан Бөкейхан: «Ultqa qyzmet etý – bilimnen emes, minezden»

AQTOGAI AJARY



«Қарағанды журналистикасын дамытуға қосқан үлесі үшін»

1938 жылдың 15 тамызынан
бастап шығады

Ақтоғай айдандық қоғамдық-саяси басылым

f www.facebook.com/a.ajary.kz

№ 1-2 (7987) 10 қаңтар, Жұма 2025 жыл

@ aktogai_red@mail.ru

* Ақорда

* Редактор бағаны

Қасым-Жомарт Тоқаев: «Мақсатым – экономиканы және егемендікті нығайту»

– Құрметті Қасым-Жомарт Кемелұлы, былтыр «Egemen Qazaqstan» газетіне берген сұхбатыңызда жылды қорытындылап, алдағы уақытта атқарылатын жұмыстың басым бағыттарын белгілеп бердіңіз. Осындай сұхбаттар жақсы дәстүрге айналып келеді. Бұл елімізді дамытуға қатысты шаралардың мән-маңызын азаматтарымыздың терең түсінуіне мүмкіндік береді.

Шын мәнінде солай болып шықты. Біз еліміз үшін күрделі болса да, жүйелі экономикалық реформаларды қолға алып, алдағы бес жылдық дамуымыздың берік негізін қаладық. Сол үшін көптеген маңызды жобалар мен бастамалар жүзеге асырылды. Келешекте бұдан да ауқымды жұмыс жасалмақ. Қазақстан – әлеуметтік мемлекет. Сондықтан былтырдан бастап «Ұлттық қор – балаларға» бағдар-



Бүгін де мазмұнды әрі ашық әңгіме өрбітеміз деп ойлаймын. Алғашқы сұрақ: Қазақстан үшін өткен жыл несімен ерекше болды?

– Былтыр көптеген маңызды оқиға болды, қыруар жұмыс атқарылды. Мысалы, әбден тозығы жеткен инженерлік-коммуналдық инфрақұрылымды жаңғырту жұмыстары барлық аймақта жүргізілді. 18 миллион шаршы метр тұрғын үй пайдалануға берілді. 7 мың шақырым автокөлік жолы салынып, жөнделді. Алматы, Қызылорда және Шымкент әуежайларында жаңа жолаушылар терминалы іске қосылды. Тау-кен, мұнай-химия және металлургия салаларында ауқымды жобалар жүзеге асырылды. Қайта өңдеу секторы қарқынды дами бастады. Оның өнеркәсіптегі үлесі өндіру саласының деңгейіне жуықтады. 27 миллион тоннаға жуық астық жинап, соңғы он жылдағы рекордтық көрсеткішке қол жеткізген диқандарымыздың жетістігін айрықша атап өткен жөн. Мен былтырғы сұхбатымда 2024 жыл Қазақстан үшін айрықша маңызды жыл болатынын айтқан едім.

ламасы аясында төлем беріле бастады. Зейнетақы, жәрдемақы, шәкіртақы және азаматтық сала қызметкерлерінің жалақысы көбейді. Еліміздің түкпір-түкпірінде жүздеген жаңа мектеп, балабақша және дене шынықтыру-сауықтыру орталықтары салынды. Шетелдің оннан астам беделді жоғары оқу орнының бөлімшесі ашылды. Ғылымды қаржыландыру көлемі арта түсті, мәдениет саласының қызметкерлеріне елеулі қолдау көрсетіліп жатыр. Бұқаралық спортты дамытуға баса мән берілді. Мұның бәрін азаматтардың жасампаздық әлеуетін арттыру үшін пайдалы инвестиция деуге болады. Қазір әлемде бұрын-соңды болмаған аса күрделі геосаяси ахуал қалыптасып отыр. Соған қарамастан, Қазақстан бейбітшілік үшін диалог орнату жолында тиімді рөл атқаратын мемлекет ретінде халықаралық аренадағы позициясын күшейтті. Бұл жағдай еліміздің қауіпсіздігін қамтамасыз етуге және экономикамызды орнықты (Жалғасы 4-бетте).

Жылан жылы – жағымды жаңалықтар жыл болғай...

2024 жыл деп аталатын бір жыл тарих қойнауына кетті. Өткен Ұлу біздің еліміз үшін де, ауданымыз үшін ұлыларымызды ұлықтап, ұлы істерге қадам басқан жыл болды. Міне, жағымды жаңалықтарымен жан жылытар Жылан жылы да босағамыздан аттап, қаңтарымыз Мемлекет басшысы Қасым-Жомарт Тоқаевтың “Мақсатым – экономиканы және егемендікті нығайту” деп аталатын «Ана тілі» газетіне берген сұхбатымен басталуының өзі жағымды жаңалық емес пе? Келешектен зор үміт күткен рухы мықты қазақпыз. Жылымыз үлкен реформалық өзгерістерге толы болып, Жаңа Қазақстан – жаңару мен жаңғыру жолына үлкен қадамдар жасауымыз көңілге қуаныш ұялатты. Ал, үш арыстың туған жері Ақтоғай жұрты үшін де жағымды жаңалықтар мен жетістіктерге толы жыл болды. Күнделікті өмір ағымымен жасалынып жатқан жұмыстарды, жеткен жетістіктерді аудан айнасы «Aqtogai ajary» газетінен оқып, оның әлеуметідегі парақшаларынан құрметті оқырмандарымыз дер уақытында хабардар болып отырды. Ол біздің өткен жылғы жарық көрген әрбір нөмірімізде тайға таңба басқандай сайрап тұр.

Құрметті оқырман! Ауданымыздың әр құтты қадамын жаңалықтың жаршысы, өздеріңіздің «Aqtogai ajary» газеті халыққа жақсы жаңалықтарды жеткізуден шаршаған емес. Газетті қолдау – қазақты қолдау. Міне, 2025 жыл табалдырығымыздан аттады. Білесіздер, біраз уақыттан бері аудандық газет жеке меншікке өткен. Дегенмен журналистар жеке меншіктің деп шалқадан түсіп жатқан жоқ. Аудан өмірінің тыныс-тіршілігімен біте қайнасауда. Туған жерге оның өткені мен келешегіне жауаптылардың бірі – осы аудандық газет. Қара орман оқырман тарихты осы сарғайған парақтардан еш бұрмалаусыз таба алады. Газет – сондығымен ғана газет қой. Биыл да жылдағы дәстүрімізден таймай, халықтың үнімен ғана ақпарат айдынында еркін жүзетінімізді түсініп, алғашқы жұмысымызды оқырман жинаудан бастадық. Оқырмандарымыз да өз межелерінен



танбай, баспасөзге жазылу уақытында аудандық газетті алдыңғы орынға қойып, жазылып, іздеп жүріп оқитыны бізді қуантты. Қуанарлығы «Aqtogai ajary» газетінің демеушілері де өз үрдістерінен таймады. «Сүйер ұлың болса, сен сүй, сүйсінуге жарасын ол» – деп хәкім Абай айтқандай, ауданымыздың айнасы «Aqtogai ajary» газетінің туын жоғары көтеріп, әрбір үйде жергілікті газеттің болуына үлес қосып жүрген демеушілерімізге, ауылдық округ әкімдеріне, мектеп директорларына, ауылдық округтегі пошта қызметкерлеріне баспасөзге жазылу науқанында көрсеткен еңбектеріне алғысым шексіз. Бүгін сіздермен жаңа жылда алғаш рет жүздесіп отырмыз. Біз сіздердей рухани қолдаушыларымыздың бар екенімен мақтанамыз. «...Әуелі газета – халықтың көзі, құлағы һәм тілі. Адамға көз, құлақ, тіл қандай керек болса, халыққа газета сондай керек...» деген Алаш көсемі, жерлесіміз Әліхан Бөкейхан. Олай болса, жергілікті газеттің туын жоғары көтеру – сіздерден, мәселені шешу – бізден. Келген жылымыз табысты жыл болсын, жыл бойы бірге болайық! Газетіміздің әрбір саны босағанызға сүйіншілеген хабар, жағымды жаңалық жеткізсін. Отанымыз тыныш болып, еліміздің, жеріміздің берекесі артар жыл болсын!

ГҮЛНАР МЕТАЙҚЫЗЫ,
«Aqtogai ajary» газетінің
құрылтайшысы, ҚР Журналистер
Одағының мүшесі,
«ҚР Ақпарат саласының үздігі».



БІЗ ТҮПТІҢ ТҮБІНДЕ ТАБИҒАТТЫҢ БАЙЛЫҒЫНА ЖӘНЕ КҮНДЕЛІКТІ ТҮРМЫС-ТІРШІЛІГІМІЗГЕ НЕМҚҰРАЙЛЫ ҚАРАЙТЫН ЖАҒЫМСЫЗ ӘДЕТТЕН БІРЖОЛА АРЫЛУЫМЫЗ ҚАЖЕТ.

ТАЗАЛЫҚТЫ САҚТАУ ЖӘНЕ ТАБИҒАТТЫ АЯЛАУ ҰЛТТЫҚ БОЛМЫСЫМЫЗДЫҢ АЖЫРАМАС БӨЛІГІНЕ АЙНАЛУҒА ТИІС. ӨРКЕНИЕТТІ ЕЛДЕРДІҢ БӘРІ ОСЫНЫ ҰСТАНАДЫ.

Мемлекет басшысы ҚАСЫМ-ЖОМАРТ ТОҚАЕВТЫҢ
«Ана тілі» газетіне берген сұхбатынан



ӘДІЛЕТТІ МЕМЛЕКЕТ ДЕГЕНІМІЗ – ҚҰҚЫҚТЫҚ МЕМЛЕКЕТ. ОНДА АЗАМАТТАРДЫҢ БӘРІ ЗАҢ АЛДЫНДА ТЕҢ БОЛАДЫ. ЗАҢДАРДЫ, ЕРЕЖЕЛЕРДІ ЖӘНЕ НОРМАЛАРДЫ ҚАТАҢ САҚТАЙ ОТЫРЫП, ЖАЛПЫҒА БІРДЕЙ МҮМКІНДІКТЕРДІ ТОЛЫҚ ПАЙДАЛАНА АЛАДЫ.

АЙТПАҚШЫ, ЗАҢСЫЗ АЛЫҢҒАН ҚАРЖЫ ЖӘНЕ БАСҚА ДА АКТИВТЕРДІ ҚАЙТАРУҒА ҚАТЫСТЫ ЖҰМЫСТЫҢ НӘТИЖЕСІНДЕ 2022 ЖЫЛДАН БЕРІ МЕМЛЕКЕТ ҚАЗЫНАСЫНА 2 ТРИЛЛИОН ТЕҢГЕДЕН АСТАМ (4,1 МИЛЛИАРД ДОЛЛАР) ҚАРАЖАТ ТҮСТІ.

БҮЛ ҚАРЖЫ МЕКТЕПТЕР МЕН МАҢЫЗДЫ ИНФРАҚҰРЫЛЫМ НЫСАНДАРЫН САЛУҒА ЖӘНЕ ӨЗГЕ ДЕ ӘЛЕУМЕТТІК МІНДЕТТЕРДІ ОРЫНДАУҒА ЖҰМСАЛЫП ЖАТЫР. ӘДІЛДІК ДЕГЕНІМІЗ ОСЫ ЕМЕС ПЕ?

Мемлекет басшысы ҚАСЫМ-ЖОМАРТ ТОҚАЕВТЫҢ
«Ана тілі» газетіне берген сұхбатынан



МЕНІҢ БАСТЫ МАҚСАТЫМ – МЕМЛЕКЕТІМІЗДІҢ ЭКОНОМИКАЛЫҚ ӘЛЕУЕТІН, ЕГЕМЕНДІГІН ЖӘНЕ ХАЛЫҚАРАЛЫҚ АРЕНАДАҒЫ ОРЫННЫҢЫҒАЙТА ТҮСУ.

МЕМЛЕКЕТ БАСШЫСЫ БОЛҒАН СӘТТЕН БАСТАП ҚАЗІРГЕ ДЕЙІН ҚАБЫЛДАҒАН ШЕШІМДЕРІМ МЕН ОНЫҢ ТҮРЛІ САЛДАРЫ ҮШІН БАР ЖАУАПҚЕРШІЛІКТІ ӨЗ МОЙНЫМА АЛАМЫН. МЕН БАСҚАША ЖҰМЫС ІСТЕЙ АЛМАЙМЫН, ІСТЕГІМ ДЕ КЕЛМЕЙДІ.

Мемлекет басшысы ҚАСЫМ-ЖОМАРТ ТОҚАЕВТЫҢ
«Ана тілі» газетіне берген сұхбатынан



УАҚЫТТЫ ДҰРЫС ПАЙДАЛАНУ ТУРАЛЫ БАРСЕЛОНА ДЕКЛАРАЦИЯСЫНДА ӘРТҮРЛІ УАҚЫТ БЕЛДЕУІН ЕНГІЗУГЕ, ОНЫ ҚЫСҚЫ ЖӘНЕ ЖАЗҒЫ УАҚЫТҚА АУЫСТЫРУҒА ӘУЕС БОЛМАУ ҚАЖЕТТІГІ АЙТЫЛҒАН.

ДЕГЕНМЕН, АЗАМАТТАРЫМЫЗ ӨТІНІШ БІЛДІРІП ЖАТЫР. ҮКІМЕТТІҢ ШЕШІМІНЕ ҚАТЫСТЫ АШЫҚ ТАЛҚЫЛАУЛАР ЖАНДАНА ТҮСТІ.

МЕНІҢШЕ, ҚОҒАМДА КӨЗҚАРАС ҚАЙШЫЛЫҒЫН ТУДЫРАТЫН МҮНДАЙ МӘСЕЛЕЛЕРДІ МҰҚИЯТ ТАЛҚЫЛАУ ҚАЖЕТ.

Мемлекет басшысы ҚАСЫМ-ЖОМАРТ ТОҚАЕВТЫҢ
«Ана тілі» газетіне берген сұхбатынан

Халықты толғандырған мәселелер жан-жақты қамтылған

Еліміздің Президенті Қасымжомарт Кемелұлы Тоқаевтың "Ана тілі" газетіне берген сұхбатында мемлекет басшысы өткен жылғы еліміздің дамуы мен болған оқиғаларына кеңінен тоқталып, тарқатып түсіндіре отырып, әлемдегі шиеленіскен геосаяси жағдайдағы Қазақстанның ұстанған саяси бағытын, елдегі өнім шығаратын өндірістер туралы, халықты толғандырып жүрген уақыт белдеуін, "Таза Қазақстан" акциясының мәні мен мағынасын айтса, келген 2025 жылғы атқарылар жұмыстарға да тоқталып, жан-жақты ашық баяндап айтты.

Көрші Ресей, Қытай сияқты елдермен қатар, Америка, Түркия сияқты алпауыт елдермен ұстанған саясатымызға баға берілді. Президентіміздің келер жылды "Жұмысшы мамандықтар жылы" деп жариялағанын бәріміз жақсы білеміз. Ағымдағы жылы ел болып атқарар жұмысымыз ұшан теңіз. Ел Президентінің алдыға қойған бағыт-бағдарын, тапсырмасын орындауда Халық болып жұмылып, жұдырықтай түйіліп, береке-бірлікпен кіріссек, біз бағындырмайтын белес, біз аспайтын асу жоқ. Тәртіп пен Заңға бағынып, кемелденген, гүлденген Қазақстанды құру жолында баршамызға абырой тілеймін.

Р.Әбеуов,
аудандық мәслихат төрағасы.

Бағдар айқындалып, нақты іске кірісу міндеттелді

Президентіміз Қ.Тоқаевтың «Ана тілі» газетіне берген сұхбатымен танысып шықтым. Түйгенім, Президент жыл қорытындысын жариялады: саяси, экономикалық, әлеуметтік салалардағы реформаларды жүзеге асыру барысы, ағымдағы және бұрын жарияланған мәселелер бойынша тапсырмалардың орындалуы туралы ақпарат, жаңаларын бақылауға алу (шара қабылдау қажеттілігі төтенше жағдайлар жұмысын жақсарту, су шаруашылығы) талдау, қорытындылар, басымдықтар, жайлы жұмыс бағыттарына кеңінен тоқталыпты. Мемлекет басшысы реформалар мен тандалған саясатты жүзеге асыруда жүйелі және табанды көзқарасқа, дамудың әлеуметтік тұжырымдамасын одан әрі нығайту бағыттарын атап, қоғамды толғандыратын мәселелер бойынша өз ұстанымын ашық айтты, оның ішінде өте өзекті тақырыптар (жеңістің 80 жылдығын тойлау, Талғар оқиғасы, АЭС мәселесіне және т.б.), талқылауға себеп болған сұрақтарға жауап берді. Сондай-ақ, экономистердің жұмысына, нақты секторларда жұмыс істейтін

сарапшыларды тарту қажеттігін айта отырып, Үкіметтің, Парламенттің жұмысына нақты баға беру қоғамның қазіргі сұранысына, сондай-ақ алға қойылған міндеттерге жауап беретіні сөзсіз екендігін баса айтты. Маңызды лейтмотив «Құқықтық тәртіп» қағидатын мемлекеттің жазалау механизмінің бөлігі ретінде емес, азаматтардың қоғамдық санасының тұрақты бөлігі ретінде қалыптастыруға баса назар аудару болды, сонымен қатар әділеттілік, саналылық оның болуы мемлекет пен азаматтар арасында сенім көпірін құруға қабілетті шара болып қала береді. Еліміздің сыртқы саясат саласындағы беделін нығайту, мемлекет брендин қалыптастыру және оны әлемде орта держава ретінде қабылдау ерекше назарға лайық, өйткені олар бізді осы салаларда айтылған бағыттарды одан әрі дамыту және қолдау бағытында ұстануға міндеттейді. Жаңа Қазақстанды жаңғырту жолында баршамыз жұдырықтай жұмылып еңбек етейік!

Сәкітай Сыздықов,
аудандық ардагерлер кеңесінің төрағасы.

Жаңа Қазақстанға бет алған жаңашыл көзқарас

Мемлекет басшысының «Ана тілі» газетіне берген сұхбатын оқып шықтым. Биыл ел өмірінде үлкен өзгерістер орын алып, экономикалық, қоғамдық саяси және гуманитарлық салаларда атқарылатын жұмыстың негізгі бағыт-бағдары айқындалатынын Президент тілге тиек етіпті. Өткен жылда орын алған маңызды оқиғаларға тоқталған Мемлекет басшысы алдағы міндеттерді де саралап берді. 2024 жылы елімізде бірқатар ауқымды жұмыстар атқарылғанын атап, 2025 жылғы жоспарлы жұмыстарға да кеңінен тоқталды. Сұхбатта халықты толғандырған мәселелер жан-жақты қамтылып, оған Мемлекет басшысының толыққанды жауап бергенін байқаймыз. Өткен жылы бастау алған, «Таза Қазақстан» жобасының жүзеге асуына тазалықты сақтау және табиғатты аялау ұлттық болмысымыздың ажырамас

бөлігіне айналуға тиіс екеніне алғашқы кезекте тоқталды. Президент: – «Жобаның жүзеге асуына, ең алдымен, әкімдер жауапты. Елді мекендердің тазалығы – тұрмыс сапасының жоғары екенін білдіреді. Сондықтан, «Таза Қазақстан» идеясы ұлттық идеологиямыздың аса маңызды бөлігіне айналуға тиіс», – деп баса айтты. Сұхбат барысында көптің көкейінде жүрген Қаңтар оқиғасының шығу себебіне терең үңіліп, оған талдау жасала келіп, саяси реформалар жасауға бетбұрған Қазақстанның алдында үлкен міндет-мақсат тұрғанын және оған әрбір азаматты барынша адал еңбек етіп, үлес қосуға шақырды.

Өткен жылы қабылданған заңдарға, олардың маңызына жеке-жеке тоқталып, мысалы әйелдердің құқығын қорғауға және балалардың қауіпсіздігін қамтамасыз етуге арналған заңға, оның ішінде тұрмыстық зорлық-зомбылық

жасағандарға жаза күшейтілгенін, көмелетке толмағандарға әлімжеттік жасайтындар әкімшілік жауапкершілікке тартылатыны бұқара көңілінен шықты. Сонымен қатар, «Келешек» атты бірінші ерікті жинақтаушы жүйенің заңнамалық негізін қалыптастыру үшін игілікті жұмыс атқарылып жатқандығы, медицина қызметкерлерін құқықтық жағынан қорғау шаралары күшейтілгені, балалар мен жастардың арасында жаппай тарап, нағыз індетке айнала бастаған вейперді сатуға және таратуға тыйым салынғаны, есірткі өндіргені үшін берілетін жаза қатайғаны, қазіргі уақыттың індетіне айналған лудоманиямен күреске қатысты заң күшіне енгені, көмелетке толмағандарды құмар ойынға тартқаны үшін әкімшілік жауапкершілік белгіленгені, бұзақылық және вандализм жасағандар

қатаң жазаға тартылатыны ұрпақ тәрбиелеп отырған ата-аналар көңіліне сенім, қуаныш ұялатты. Дегенмен, Президент сұхбатында: – Алайда Заңның қабылдануы істің басы ғана, сол заңдардың іс жүзінде жұмыс істеуі одан әлдеқайда маңызды екенін түсіну керектігін баса айта келіп, халықтың үміті мен мүддесін және елімізді дамыту жолындағы басымдықтарды негізге ала отырып, құқық қорғау жүйесін жетілдіру жұмыстарын жалғастырамыз, – деді.

Сырлы сұхбаттан түйгеніміз, «Мақсатым – экономиканы және егемендікті нығайту» тақырыбын арқау еткен сұхбат ел өміріндегі көптеген түйткілді мәселелерді қамти отырып жүргізілгенін анық байқаймыз.

Г.Елеусізова,
Ақтоғай ауылдық аналар кеңесінің төрайымы.



Жылан- жайлылық пен жақсылық жылы

Қазақ халқының дәстүрінде жыл санаудың 12 жылдық циклі ерекше орын алады. Әр жыл жануар атымен аталып, өзіндік мінез бен қасиетке ие деп есептеледі. Солардың бірі – Жылан жылы, ол күрделілігімен, жұмбақтылығымен және өзгерістерге толы кезеңдерімен танымал.

Жыл қайыру

Қазақта жыл қайыру - он екі жылдан тұрады. Он екі жылды ата-бабамыз бір мүшел деп санаған. Әр мүшел он екі түрлі аң мен жануардың атымен аталған.

Бірінші – тышқан жылы, екінші – сиыр, үшінші – барыс, төртінші – қоян, бесінші – ұлу, алтыншы – жылан, жетінші – жылқы, сегізінші – қой, тоғызыншы – мешін, оныншы – тауық, он бірінші – ит, он екінші – доңыз жылы. Әрбір жануардың жылы наурызда кіреді.

Әр мүшел аяқталып, екіншісі басталғанда, он үшінші жыл тағы да тышқаннан саналып, есеп қайта ашылады. Бірінші мүшел – 13 жас, содан кейін он екі жылдан қосыла береді.

Жылан жылының қазақ тарихындағы маңызы

Жылан жылы қазақ тарихында маңызды оқиғалармен есте қалған. Бұл жылдар әдетте үлкен өзгерістер мен сынақтарға толы болған. Алайда, қиындықтарды еңсеру арқылы жаңа мүмкіндіктер ашылған.

– Бейімделу кезеңі: Қазақтар Жылан жылы қиыншылықтарға қарамастан, осы кезеңді бейімделудің және жаңарудың уақыты деп санаған.

– Тарихи оқиғалар: Белгілі тарихи жылдарда Жылан жылы маңызды бетбұрыстардың уақыты болған, бұл ұлт үшін сабақ алатын кезең ретінде қарастырылған.

Жылан жылы дүниеге келген адамдар

Жылан жылы дүниеге келген адамдар туралы қазақтар ерекше айтқан. Олар:

- Ақылды және интуициясы жоғары.
- Сабырлы, бірақ шешім қабылдағанда табанды.
- Құпияшыл және өз ойларын әрдайым ашық айтпайды.

Жылан жылының сипаттамасы

Жылан жылы – қазақ дәстүрінде ақыл-парасаттың, сақтықтың және терең ойдың символы. Бұл жылды қазақтар ерекше құрметтеген, өйткені жылан табиғаттың тепе-теңдігін сақтаушы ретінде танылған.

– Мінез-құлық: Жылан – суыққанды, бірақ ақылды, сабырлы, кейде тіпті қулыққа бейім. Мұндай қасиеттер жылан жылында туылған адамдарға да жатқызылған.

– Кезеңнің сипаты: Жылан жылы тыныштық пен сақтықты қажет етеді. Бұл жылы басталған істерде асығыстыққа жол бермеу маңызды.

2025 жыл: Жылан жылы қандай болады?

2025 жыл – жылан жылы қазақ халқын не күтіп тұр? Жылан жылы адамдарға ұқыптылық, шешімталдық және мақсаттарға жетуде табандылық сыйлайды.

2025 жылды қалай қарсы алуға болады?

Өзіңізді дамытыңыз: Білім алу, жаңа дағдыларды игеру және денсаулығыңызды күту маңызды.

Сабырлы болыңыз: Жылан жылы асығыс әрекеттерге жол бермейді, сондықтан шешімдерді мұқият қабылдаңыз.

Жаңа бастамалардан қорықпаңыз: Жыланның күш-қуаты сіздің батыл қадамдарыңызды қолдайды.

2025 жыл – терең ойлану, дана шешімдер қабылдау және мақсаттарға жету кезеңі. Шығыс күнтізбесі бойынша бұл Жылан жылы болса, астрология оны жеке даму және үйлесімділік жылы деп сипаттайды. Келесі жылды табысты өткізу үшін армандарыңызды айқындап, оларға жетуге талпыныңыз!

Жылан жылын қалай қарсы алу керек?

Бүгінгі таңда Жылан жылы өзгерістер мен жаңа мүмкіндіктерге дайын болуды меңзейді. Бұл жыл адамға өз өмірін қайта қарап, жаңа жоспарлар құруға мүмкіндік береді.

Жылан жылы қазақ халқы үшін тек жыл қайыру жүйесінің бір бөлігі ғана емес, терең мағыналы кезең. Бұл жыл сабырлық пен ақылмен әрекет етуге шақырады, ал қиындықтардан сабақ алудың және жаңа деңгейге көтерілудің мүмкіндігі ретінде қарастырылады. Жылан жылы келгенде қазақ халқы үмітпен, сақтықпен және жаңа бастамаларға дайындықпен қарсы алған.

Жылан жылы қандай болады?

Шығыс күнтізбесіне сәйкес 2025 жыл – жылан жылы болады. Жылан шығыс мәдениетінде даналықтың, сабырлылықтың және терең ойдың символы ретінде көрініс береді. Бұл жыл адамдардың ішкі дүниесін дамытуға, маңызды шешімдер қабылдауға және өмірді жақсартуға қолайлы уақыт болмақ. Шығыс күнтізбесі әр адамның туған жылының белгісіне байланысты жыл әсерін сипаттайды. Жылан жылы адамдарға ұқыптылық, шешімталдық және мақсаттарға жетуде табандылық сыйлайды. Бұл жыл әсіресе шығармашылық адамдар мен стратегиялық ойлайтындарға табыс әкелуі мүмкін. Астрологиялық тұрғыда 2025 жыл жеке дамуға, қарым-қатынасты нығайтуға және жаңа бастамаларға бағытталады. Астрологтар бұл жылды: Ішкі үйлесімге жету кезеңі. Жаңа жобаларға батылдық таныту мүмкіндігі деп атайды.

Қазақстан үшін 2025 жыл мемлекеттік бағдарламалардың жаңа кезеңдерімен, мәдени іс-шаралармен және экономикалық реформалармен есте қалуы мүмкін. Әлемде жасыл технологиялар, жасанды интеллект және әлеуметтік мәселелердің шешімі басты назарда болады деп күтілуде.

«Жылы-жылы сөйлесең, жылан інінен шығады» деуші еді. Бірақ Жылан жылы туылғандарды сұлу сөзбен сиқырлап, қақпанға түсіремін деп ойлаудың өзі әбестік. Олар кез келген жағдайдың түбіне терең бойламай, шешім қабылдамайтындардың қатарынан.

Жылан жылы туылғандар сырт көзге ұяң, маңызды істерден қашақтап жүреді. Басына пәле болып жабысатын нәрсе - тілі. Бойдағы бар күш-жігерді сарқуға тырыспаңыз. Қолда бардың қадірін бағалаған жөн. Өзгенің пікіріне мән беріп, күмәндана бергенді қою керек. Өзім білемге салып, өзгелерді ығыр қылмаңыз.

Сіз үшін бұл жылдың маңызы зор. Отбасында оны-мұны жағдайлар орын алса, аса көп уайымдаудың қажеті жоқ. Қай іске кіріссеңіз де, түбінде одан жеңімпаз болып шығасыз. Алайда шаруа деп орынсыз шаршай берудің де пайдасы шамалы. Күшіңізді бағаламай, әрбір іске кірісе берудің қажеті жоқ. Сезім мәселесінде жарқын өзгерістер сезілмейді. Сондай-ақ ақша жағынан да «алақайлайтын» сәттер аз. Ал шығармашылық жолындағы жандар үшін бұл жылды сәтті деп санауға болады. Жыл аяғында асығыңыз алшысынан түсіп, бір жақсылыққа кеңелуіңіз мүмкін.

AQTOĞAI AJARY

(Жалғасы. Басы 1-бетте).

ты дамытуға септігін тигізеді.

Жалпы, өткен жыл оңай болған жоқ, тіпті күрделі жыл болды деуге келеді. Қазақстанға сыртқы факторлардың салқыны тиді, табиғат апаты да жоспарларымызға әсер етті. Алайда біз ахуалды бақылауда ұстап қана қоймай, жан-жақты реформаларымызды жалғастыра алдық. Осылайша, жасампаздық стратегиясы одан әрі жүзеге асырылып жатыр.

– Сіз былтырғы табиғат апатын еске алдыңыз, яғни өңірлердің тең жартысын басып қалған алапат су тасқынын тілге тиек еттіңіз. Сол кезде уәкілетті органдарға апаттың салдарын жою туралы нақты тапсырма бердіңіз. Содан бері жұрт ауқымды жұмыс атқарылғанына куә болды. Бірақ қарғын су кезінде қордаланған көптеген мәселенің беті ашылды. Мемлекет осы табиғат апатынан қандай сабақ алды?

– Былтырғы тасқын еліміз үшін зор сынақ болды. Мұндай алапат тасқын Қазақстанда бұрын болмаған. Мемлекет орасан зор қауіптің бетін қайтару үшін шұғыл шаралар қабылдады. Адамдар дер кезінде қауіпсіз жерге көшірілді, олардың уақытша паналайтын орындары әзірленді, материалдық резервті пайдалануға рұқсат берілді. Апаттан құтқару жұмыстарына Төтенше жағдайлар министрлігінің ғана емес, Ішкі істер және Қорғаныс министрліктерінің, Ұлттық ұланның және басқа да құрылымдардың қызметкерлері, жалпы саны 63 мыңға жуық адам жұмылдырылды. Соның арқасында көптеген азаматты құтқарып, аман сақтап қалдық. Ең бастысы – осы.

Бір ел, бір халық болып, жұдырықтай жұмыла білсек қана мұндай апаттарды еңсере алатынымызға бәріміз көз жеткіздік. Су тасқыны кезінде волонтерлер қозғалысының әлеуеті зор екенін көрдік. Еліміздің түкпір-түкпірінен келген еріктілер құтқарушыларға жәрдемдесті, гуманитарлық көмек ұйымдастырып, зардап шеккендерге қолдау көрсетті.

Қарғын судың қарқыны шынымен де қатты болды: үйлер, жолдар, көпірлер, әлеуметтік және коммерциялық нысандар бүлінді, біраз мал қырылды. Бөгеттер мен гидротехникалық қондырғылар салуға ондаған жыл бойы жете көңіл бөлінгенде, апаттың салдары соншалықты ауыр болмас еді. Мұны мойындау керек. Қазір қателікті түзеп, олқылықтың орнын толтыруға кірістік. Парламентте жаңа Су кодексінің жобасы қаралып жатыр. Су ресурстарын басқару тұжырымдамасы және оның кешенді жоспары бекітілді. Онда 2030 жылға дейін 40-тан астам су қоймасын салу және 37 су қоймасын жөндеу қарастырылған. Сондай-ақ жалпы ұзындығы 14 мың шақырымнан асатын ирригация каналдарын жаңғырту көзделген.

Төтенше жағдайларды болжау және оның алдын алу жүйесін жаңғыртуға қатысты ауқымды жұмыстар басталды. Су мамандарының тапшылығы мәселесін шешу және зерттеу жұмыстарын жандандыру үшін Қазақ ұлттық су шаруашылығы

және ирригация университеті құрылды.

Былтыр желтоқсан айының басында Сауд Арабиясында One Water Summit атты басқосу өтті. Қазақстан мен Франция төрағалық еткен осы алқалы жиынға қатысып, сөз сөйледім. Онда суға байланысты апаттарға төтеп беру мүмкіндігін арттыру қажеттігіне арнайы тоқталдым. Шын мәнінде, халықаралық қауымдастық су қауіпсіздігін қамтамасыз ету және климаттың өзгеруіне қарсы күресу үшін бірлесе әрекет етуі керек. Қазақстан осы мәселеге басымдық береді.

Күрделі сәттерде қоғамдағы қордаланған келеңсіздіктердің беті ашылатынын өмірдің өзі көрсетіп отыр. Бірақ әр қиындықтың қайыры бар. Сондықтан дағдарыс кезінде байбалам салмай, байыпты болған жөн. Біз өзекті мәселелерге қатысты дұрыс шешім қабылдап, істің көзін таба білуіміз қажет.

Әдетте мемлекеттік қызметшілерді орынсыз сынап-мінейтін әңгімелер жиі айтылады. Алайда бәрі де салыстырғанда көрінеді. Әсіресе басқа елдермен салыстыру арқылы сараланады. Біз коронавирус індетінен бастап қазірге дейін дағдарысты жағдайлардың бәрінен ойдағыдай өтіп келеміз.

Көктемгі су тасқынының салдарын жою үшін қабылданған шаралар мемлекеттің тиімді жұмыс істей алатынын көрсетті. Зардап шеккен бір де бір отбасы көмек-қолдаусыз қалған жоқ. Ұй салынды, пәтер берілді, инфрақұрылым нысандары қалпына келтірілді, қарғын судан зардап шеккен барша тұрғындар мен кәсіпкерлердің шығыны өтелді. Мұның бәрі өте қысқа мерзім ішінде жасалды. Су тасқынының салдарын жоюға ірі бизнес өкілдері де елеулі үлес қосты.

Бүгінгі дүрбелеңге толы дүниеде техногендік сипаттағы апаттар мен табиғат апаттары көбейіп тұр. Оның бәрін еңсеруге көптеген ел, соның ішінде дамыған мемлекеттердің өзі дайын болмай жатады. Біз бұған 2024 жылы да анық көз жеткіздік. Әрине, әлі көп жұмыс істеу қажет екені сөзсіз. Дегенмен төтенше жағдайға төтеп беру тұрғысынан, Қазақстан басқа елдермен салыстырғанда лайықты орында тұр.

Желтоқсанның соңғы күндері Ақтау қаласында Әзербайжан әуе компаниясының ұшағы апатқа ұшырады. 38 адам қаза болды, оның ішінде еліміздің 6 азаматы бар. Ауыр жарақат алғандар да көп. Мұндай сәтте әрбір секунд қымбат. Құтқарушылар, дәрігерлер мен тәртіп сақшылары шұғыл әрі үйлесімді әрекет етті, кәсіби деңгейі мен азаматтық жауапкершілігі жоғары екенін көрсетті. Жақын жердегі Маңғыстау өңірлік электр торабы компаниясының жұмысшылары бірден көмекке келді. Төңіректегі тұрғындар да зардап шеккендерді құтқаруға атсалысты. Азаматтарымыздың жанқиярлығы арқасында барынша көбірек адамның өмірін сақтап қалдық. Мен құтқару жұмыстарына қатысқан әрбір адамға шын көңілден ризашылығымды білдіремін. Қазақ халқының апаттан зардап шеккендерге жанашырлығы мен

тілеулестігі азаматтарымыздың

жаппай қан тапсыруға асыққанынан да айқын байқалды.

Ұшақ апатының себебін анықтау үшін Үкімет комиссиясы құрылғанын атап өткім келеді. Сонымен бірге 17 халықаралық сарапшы шақырылды. Оның ішінде Халықаралық азаматтық авиация ұйымының және Мемлекетаралық авиация комитетінің мамандары бар. Үкімет комиссиясы мәліметтің бәрі жазылған арнайы құрылғыны сол ұшақты жасаған Бразилия еліне жіберу туралы шешім қабылдады. Бұл қадам тергеу жұмыстарының объективті әрі бейтарап жүргізілуіне қажетті бірден-бір дұрыс шешім екеніне сенімдімін.

– Сіз Сауд Арабиясындағы халықаралық форумға қатысқаныңызды атап өттіңіз. Жалпы, былтыр әлемдік деңгейдегі осындай көптеген іс-шараға қатыстыңыз. Бұл сіздің сыртқы саясатқа баса мән беретініңізді меңзеп, «Президент – кәсіби дипломат, сондықтан халықаралық мәселелерге көбірек назар аударады» деген әңгіменің шығуына түрткі болды. Шынымен де солай ма?

– Қазақстан орналасқан жері, экономикалық әлеуеті және қазіргі геосаясат ахуалы тұрғысынан алғанда, әлемнің көптеген мемлекеті үшін стратегиялық маңызы бар ел саналады. Бізбен байырғы серіктестеріміз ғана емес, сонау Африка құрлығындағы мемлекеттер де достық қатынас құруға мүдделі. Батыста, жалпы жер жүзінде Қазақстанды орта держава деп атайды. Әрине, бұл мәртебенің салмағы да ауыр. Біз, ең алдымен, халықаралық аренадағы іс-әрекеттерімізге жауапкершілікпен қарап, қазіргі заманның аса күрделі мәселелеріне келгенде, сындарлы ұстанымда болуымыз керек. Сондықтан Қазақстан «барша адамзаттың ортақ үйі», еш баламасы жоқ әрі әмбебап құрылым саналатын Біріккен Ұлттар Ұйымын қашанда жақтайды.

Сонымен бірге Мемлекет басшысы ретінде ішкі саясат мәселелерімен күнделікті айналысамын. Бұл – өте маңызды жұмыс. Сондықтан менің қызметімде сыртқы саясатқа басымдық беріліп кетті деген пікір дұрыс емес.

Менің басты мақсатым – мемлекетіміздің экономикалық әлеуетін, егемендігін және халықаралық аренадағы орнын нығайта түсу. Мемлекет басшысы болған сәттен бастап қазірге дейін қабылдаған шешімдерім мен оның түрлі салдары үшін бар жауапкершілікті өз мойныма аламын. Мен басқаша жұмыс істей алмаймын, істегім де келмейді.

– Ақыры, Біріккен Ұлттар Ұйымы туралы айтылған соң, бір тосын сұрақ қоюға рұқсат етіңіз. Әлеуметтік желіде Сіз 2026 жылы Біріккен Ұлттар Ұйымын басқаруыңыз мүмкін, соған байланысты елімізде кезектен тыс Президент сайлауы өтеді деген қауесет тарап жатыр. Осы қауесеттің негізі бар ма?

– Мен Біріккен Ұлттар Ұйымы бас хатшысының орынбасары және Қарусыздану жөніндегі конферен-

10 қаңтар 2025 жыл

цияның бас хатшысы ретінде осы ұйымның Женевадағы кеңсесін үш жылға жуық басқардым. Халықаралық үдерістердің қырсырына бойлап, мол тәжірибе жинадым. Осының өзі артығымен жетеді деп ойлаймын. Менің елімізді дамытуға қатысты талай жылға арналған ауқымды жоспарларым бар, оның бәрін жүзеге асыруға ниеттімін.

– Былтыр «Таза Қазақстан» экологиялық акциясы басталды. Игі бастама барлық өңірді қамтыды. Сіз «Таза Қазақстан» дегеніміз көше тазалаудан әлдеқайда ауқымды ұғым екенін атап өттіңіз. Осы бағыттағы жұмыс қалай жалғасады?

– «Таза Қазақстан» акциясы қоғамға экологиялық мәдениеттің жаңа талаптарын енгізу идеясынан бастау алады. Халықтың бұл бастамаға барынша қолдау білдіргеніне тәнтімін. Әсіресе, жастарға ризашылығымды білдіргім келеді. Қазақстан азаматтары мұның кезекті бір науқан емес, озық ойлы қоғам қалыптастыру жолындағы идеологиялық платформа екенін түсінді.

Біз, түптің түбінде, табиғаттың байлығына және күнделікті тұрмыс-тіршілігімізге немқұрайлы қарайтын жағымсыз әдеттен біржола арылуымыз қажет. Тазалықты сақтау және табиғатты аялау ұлттық болмысымыздың ажырамас бөлігіне айналуға тиіс. Өркениетті елдердің бәрі осыны ұстанады.

Бұл акцияға 3,8 миллионға жуық адам қатысты. 1,5 миллион тоннадан астам қоқыс жиналып, 3,2 миллионнан астам көшет егілді. Осының өзі азаматтарымыздың сана-сезімі жоғары, олардың Қазақстанды өзгертуге нақты іспен үлес қосуға дайын екенін көрсетпей ме?

«Таза Қазақстан» жобасының жүзеге асуына, ең алдымен, әкімдер жауапты. Елді мекендердің тазалығы – тұрмыс сапасының жоғары екенін білдіреді. Мен аймақтарға барғанда қалалардың қалай абаттандырылғанына үнемі назар аударамын. Осы ретте «Таза Қазақстан» идеясы ұлттық идеологиямыздың аса маңызды бөлігіне айналуға тиіс екенін тағы да қайталап айтамын.

– Қоғамда бірыңғай уақыт белдеуі туралы түрлі пікір бар. Парламент пен Үкіметтің арасында осыған қатысты пікірталас жүріп жатқанын да білеміз. Бұл жөнінде не айтар едіңіз?

– Әрине, мен жағдайды көріп-біліп отырмын. Үкімет өз шешімінің орынды екеніне сенімді және Қазақстан бір уақыт белдеуінде болуы қажет деп санайды. Уақытты дұрыс пайдалану туралы Барселона декларациясында әртүрлі уақыт белдеуін енгізуге, оны қысқы және жазғы уақытқа ауыстыруға әуес болмау қажеттігі айтылған. Дегенмен азаматтарымыз өтініш білдіріп жатыр. Үкіметтің шешіміне қатысты ашық талқылаулар жандана түсті. Меніңше, қоғамда көзқарас қайшылығын тудыратын мұндай мәселелерді мұқият талқылау қажет. Сондықтан Парламентте ғалымдардың, сарапшылардың және аймақ өкілдерінің (Жалғасы 5-бетте).

AQTOĞAI AJARY

(Жалғасы. Басы 1-4 беттерде).

қатысуымен қоғамдық тыңдау өтті. Тараптар уақыт белдеуін ауыс-тырудың ел экономикасына және азаматтардың тұрмысына әсері жөніндегі барлық пікірді ескере отырып, 1 наурызға дейін жан-жақты зерттеу жүргізуге уағдаласты. Содан кейін нақты ұсыныстар әзірленеді. Парламент пен Үкімет бұл мәселені байыппен зерделеп, ортақ әрі дұрыс шешімге келетініне сенімдімін.

– Сіз былтырғы сұхбатыңызда «Дербестікке және қосымша өкілеттікке ие болуға ұмтылған Үкімет қалағанын алды. Бірақ «алмақтың да салмағы бар», олар өздеріне қойылатын талап та күшейетінін түсінуге тиіс» деген едіңіз. Үкіметтің жаңа құрамы жасақталғанына, міне, 11 ай өтті. Меніңше, бұл – белгілі бір пайым жасауға жеткілікті мерзім. Министрлер кабинетінің жұмысына көңіліңіз тола ма?

– Үкіметтің міндеті – экономиканың өсімін қамтамасыз ету және азаматтардың әл-ауқатын жақсарту. Жалпы алғанда, Министрлер кабинеті бұл міндетін орындап отыр. Экономиканы әртараптандыру, өңдеу өнеркәсібін дамыту, инфрақұрылымды жаңғырту сияқты бағыттар бойынша былтыр атқарылған жұмыстың нәтижелері жаман емес. Алайда бәрі мінсіз деуге келмейді, проблемалар да бар.

Мен министрлерден неғұрлым тиімді жұмыс істеуді және шешім қабылдағанда батыл болуды үнемі талап етемін. Қоғам да Үкіметтің жұмысына жоғары талап қояды. Бұл – өте орынды әрі қалыпты жағдай. Сондықтан Үкіметтің жұмысы нақты нәтижеге орай, әділ бағаланады. Басты көрсеткіш – азаматтардың тұрмыс сапасы. Экономикадағы жетістіктер адамдардың күнделікті өміріне оң әсерін тигізбесе, оны әншейін сөз жүзіндегі жетістік деуге болады.

Жуық арада Үкіметтің кеңейтілген отырысы өтеді. Сол кезде жылды қорытындылап, қазіргі мәселелерді талқылап, жаңа жоспарлар жасаймыз. Қазақстанға экономиканың 4 пайыздық өсімі аздық ететіні анық. Бұл туралы шетел өкілдеріне де айтып жүрмін. Үкімет экономиканы барынша дамыту үшін тың тәсілдер табуға тиіс.

– 2024 жылдың қараша айында теңгенің долларға шаққандағы бағамы 500-ден асып кетті. Оны белгілі бір психологиялық меже деуге болады. Ұлттық валюта бағамының тұрақсыздығына нарықтағы түрлі фактор әсер ететіні түсінікті. Дегенмен мұндай қаржы-валюта саясаты қаншалықты орынды? Бұл жағдай экономикалық реформаларды жүзеге асыруға бөгет болмай ма?

– Қазақстан әлем экономикасының ажырамас бөлігі болғандықтан, теңгеге сыртқы факторлар әсерін тигізбей қоймайды. Доллардың нығаюынан дамушы елдердің валютасы қысым көреді. Зер салып қарасақ, көптеген мемлекеттің валютасы қараша айынан әлдеқайда бұрын әлсірей бастады. Ал теңгенің бағамы ұзақ уақыт тұрақтылығын сақтап тұрды.

Біздің валюта бағамын қолдан

5

ұстап тұру тәжірибесінен бас тартқанымызға біраз уақыт болды. Нарық факторларына байланысты еркін бағам қалыптастыру жолын таңдадық. Мен теңгені күшейту үшін еліміздің алтын-валюта қорын босқа ысырап ету орынсыз деп санаймын. Нарыққа қатысы бар кейбір құрылымдар теңге бағамын басқаруға қолайлы ету туралы ұсыныстар айтып жүр. Ұлттық банк пен Үкімет оның бәрін мұқият қарастырып жатыр. Мәселені зерделеген соң бұл бағыттағы ұстанымымызды өзгерту қажет пе деген сауалдың жауабы белгілі болады. Басты мақсат – экономиканың тұрақтылығы мен тиімділігін қамтамасыз ету, нақты секторды қарқынды дамыту, еңбек өнімділігін арттыру және тұрақты жұмыс орындарын көптеп ашу.

Ашығын айтсам, экономист басшылардың қазіргі жұмысын орташа деп бағалаймын. Олар халықаралық қаржы институттарының тілімен әдемі сөйлейді, алайда нақты нәтижесі бар шаруа шамалы болып тұр. Қазір өңірлердегі ахуалды және экономиканың іс жүзінде қалай жұмыс істейтінін жақсы білетін, яғни жергілікті жерде еңбек етіп, ысылған мамандар қажет. Былтыр 17 желтоқсанда Премьер-Министр Олжас Бектеновпен кездескенде осы мәселені талқыладық.

– Биыл Қаңтар оқиғасына 3 жыл толды. Содан бері көп нәрсе айтылды. Өзіңіз де бұл мәселеге егжей-тегжейлі тоқталдыңыз. Оны былтырғы сұхбатта да тілге тиек еттіңіз. Осыған қатысты өткір сауалдарға қайта-қайта жауап беру оңай емес. Дегенмен бұл тақырыпты айналып өте алмаймыз. Ел ішінде «Қаңтар оқиғасының құпиясы толық ашылған жоқ» деген пікір бар. Бұған не айтар едіңіз? Ондай қасірет қайталанбауы үшін не істеу қажет?

– Қаңтар оқиғасынан үш жыл өткенде азаматтарымыздың көпшілігі елімізде бұрын-соңды болмаған осы дүрбелең көпе-көрінеу әлеуметтік әділетсіздіктің, саяси тоқыраудың, сондай-ақ қаскөйлердің шектен тыс менмендігінің және олардың халық пен мемлекет тағдырына немқұрайлы қарауының кесірінен орын алғанына әбден көз жеткізді. Өкінішке қарай, бұл – әлем тарихы үшін қалыпты жағдай. Мұндай жайттар Қазақстандағы оқиғаға дейін де болған, кейін де бола береді деп ойлаймын.

Қаңтар туралы түрлі долбарға толы алып қашпа әңгімелер толастамай тұр. Оның үстіне, белгілі бір саяси есебі бар, сыңаржақ ұстанымдағы кейбір адамдар деректерді бұрмалап, азаматтардың көңіл күйін өз пайдасына бейімдеуге тырысады. Тәртіп орнатуға және ахуалды тұрақтандыруға қатысты батыл шаралар қабылдаған соң, мен құзырлы органдарға Қаңтар оқиғасының мән-жайын толық әрі шынайы тергеп-тексеру туралы тапсырма бердім. Тергеу ашық жүргізілді. Қылмыскерлер жазасын алды. Парламентте біздің арғы-бергі тарихымызда бұрын-соңды болмаған арнайы тыңдау ұйымдастырылды.

Алғашқы парламенттік тыңдау Қаңтар оқиғасынан кейін үш айдан

10 қаңтар 2025 жыл

соң, әлекіншісі бір жылдан кейін өтті. Тыңдау барысында мемлекеттік органдардың өкілдері ғана емес, құқық қорғаушылар да сөз сөйледі. Түрлі ой-пікір ашық айтылды, жайсыз сұрақтар қойылды. Мұның бәрі тікелей эфирде көрсетілді, бұл процесс туралы еліміздің және шет мемлекеттердің бұқаралық ақпарат құралдары жарыса жазды. Билік халықтың көкейінде ешқандай күмән қалмауына мүдделі болғандықтан, мұндай қадамға саналы түрде барды.

Қаңтар оқиғасы туралы сөз болғанда, әр адам сол күндері көліктердің қирағанын, дүкендердің тоналғанын, қаскөйлердің мемлекеттік ғимараттарды басып алғанын, сарбаздардың соққыға жығылғанын, қару-жарақтың ұрланғанын және әйелдердің зорлықзомбылыққа ұшырағанын еске алуы керек. Жауапкершіліктен жұрдай саясаткерсымақтардың шындыққа жанаспайтын жалған ақпарат таратып, мемлекеттігімізге шынымен де қатер төнген сәтті жұрттың жадынан өшіру үшін әрекет жасауына жол бермеу керек. Абырой болғанда, азаматтардың көбі күріштен күрмекті айыра алады. Мемлекетіміздің тірегі – осындай көзі ашық, көкірегі ояу адамдар.

Бір нәрсе анық, сол кезде тәртіпсіздікті бастаған және төңкерісті ұйымдастырған адамдардың қимылына дереу тосқауыл қойып, батыл әрекет жасамағанда, қазір Қазақстан дербестігі мен егемендігі әлдеқайда шектеулі, мүлде басқа мемлекетке айналар еді.

Біз халықтың берекелі бірлігінің арқасында осы ауыр сынақтан сүрінбей өттік. Қаңтардағы оқиғадан бәрі-міздің зор сабақ алғанымыз сөзсіз. Біріншіден, елдегі билік жұдырықтай жұмыла білуге тиіс, қосарланған билікке ешқашан жол берілмеуі қажет. Екіншіден, Президент – «Құдайдың жердегі көлеңкесі» емес, мемлекетті басқару үшін белгілі бір мерзімге сайланған менеджер ғана. Үшіншіден, жоғары мемлекеттік лауазымдарға үміткерлерді, соның ішінде күштік құрылым басшыларын мұқият іріктеу керек. Олар Отанымызға, яғни Қазақстан Республикасына адал болуға тиіс. Ең бастысы, «Заң мен тәртіп» қағидатын басшылыққа алып, ел бірлігін көздің қарашығындай сақтап, әділдік қағидатын барынша орнықтыру қажет. Бұл қағидатқа қарсы шығатындар «демократиялық құндылықтар» деген желеумен қоғамға іріткі салып, түбінде қазақ мемлекеттігін жоюды көздейтіні айдан анық. Бұған еш көнуге болмайды. Заң үстемдігі – демократияның ең биік шыңы. Бұл мақсатқа жету оңай емес.

– Сіз Әділетті Қазақстанды құрып жатқаныңызды айттыңыз. Жалпы, әділдік дегенді қалай түсінесіз? Реформалардың түпкі мән-мағынасы неде деп ойлайсыз? Әділетті Қазақстан дегеніміз бәрін әлеуметтік тұрғыдан теңестіру ме, әлде әділ бәсекеге жол ашу ма?

– Ең алдымен, әділдік барлық елде және барлық заманда халықтың қалауы болғанын айта кеткен жөн. Мұның Қазақстанға да қатысы бар. Жоғарыда айтқанымдай, қасіретті

10 қаңтар 2025 жыл

оқиғаға дейін бізде әділдік деңгейі өте төмен болғаны рас.

Әділдік – бәрін теңестіру деген сөз емес. Менің ел байлығын әділ бөлу туралы ұстанымым меншік иелерін мүлкінен түгел айырып, активтерді қайта бөлу дегенді білдірмейді. Біз іштен іруге және жүгенсіздіктің белең алуына әкеп соқтыратын мұндай жолмен жүрмейміз. Сондықтан кезінде баз біреулерге орынсыз берілген артықшылықтар мен жеңілдіктерді алып тастау, заңсыз алынған активтерді мемлекетке қайтару – популистік қадам емес, керісінше, әділдік қағидасы негізінде Қазақстанды жаңғырту стратегиясы.

Әділетті мемлекет дегеніміз – құқықтық мемлекет. Онда азаматтардың бәрі заң алдында тең болады, заңдарды, ережелерді және нормаларды қатаң сақтай отырып, жалпыға бірдей мүмкіндіктерді толық пайдалана алады. Айтпақшы, заңсыз алынған қаржы және басқа да активтерді қайтаруға қатысты жұмыстың нәтижесінде 2022 жылдан бері мемлекет қазынасына 2 триллион теңгеден астам (4,1 миллиард доллар) қаражат түсті. Бұл қаржы мектептер мен маңызды инфрақұрылым нысандарын салуға және өзге де әлеуметтік міндеттерді орындауға жұмсалып жатыр. Әділдік дегеніміз осы емес пе?

– Сіз тұңғыш президенттің қызметін, оның елге сіңірген тарихи еңбегін әділ бағалау қажеттігін бірнеше рет айттыңыз. Көпшілік мұндай ұстанымның орынды екенін біртіндеп түсіне бастады. Жалпы, Нұрсұлтан Әбішұлымен жиі хабарласып тұрасыз ба?

– Кез келген дәуірдің жақсы жағы да, көлеңкелі тұстары да бар. Біздің жаңа тарихымызда жарқын сәттер әлдеқайда көп болды. Бұл – ақиқат. Салыстырмалы түрде алғанда, қысқа мерзім ішінде мемлекеттігіміздің берік тұғыры қалыптасты, билік институттары құрылды, жаңа астанамыз бой көтерді, шекарамыз шегенделіп, заң жүзінде бекітілді. Көптеген елмен тиімді қарым-қатынас орнатылды, экономикаға шетелден инвестиция тартылды. Осы жетістіктің бәрін жоққа шығару дұрыс болмас еді. Біз әділетті мемлекет құрамыз десек, тарихқа да, оны жасауға атсалысқан азаматтарға да әділ қарауымыз керек. Мұның бәрі, түптеп келгенде, ұлттың болашағы үшін қажет. Өткенді ой елегінен өткізіп, оны әділ әрі шынайы бағалай алмасақ, алға сеніммен қадам баса алмаймыз. Саяси ахуалдың ықпалымен өз тарихыңды көпе-көрінеу бұрмалай беруге болмайды. Ел шежіресін басынан бастап қайта жазу тіпті қауіпті.

Әрине, Нұрсұлтан Назарбаев ұзақ жыл бойы ел тізгінін ұстаған уақытта кемшіліктер болды. Бірақ ештеңе істемеген адам ғана қателеспейді. Ашығын айту керек, ол отставкаға кеткенімен, Қауіпсіздік Кеңесінің төрағасы болып отырған кезде саяси сыпайылықты сақтай бермейтін. Мұны да айта кеткен жөн. Үнемі Премьер-Министрді, Ұлттық банктің төрағасын, министрлерді, әкімдерді шақырып алып, жиналыс өткізетін. Бұған өз азаматтарымызды былай (Жалғасы 6-бетте).

AQTOŒAI AJARY

(Жалғасы. Басы 1-4-5 беттерде).

қойғанда, шетел басшылары мен дипломаттары да таңдана қарайтын. «Назарбаев қызметінен кеткен соң тіпті жоғарылады, енді Президент те оған бағынады» деген әзіл әңгіме де пайда болды. Ал, шын мәнінде, бұл әзілдейтін жағдай емес еді.

Бұл жағдай қосарланған билік туралы алып қашпа әңгіменің өршуіне әкеп соқты. Шенеуніктер де кабинеттен кабинетке жүгіріп, кімнің тапсырмасын орындайтынын білмей дал болатын. Ол аз десеңіз, кейбір шенеуніктер «Елбасы институты Президент билігінен жоғары тұруға тиіс» деп, ақылға сыймайтын жағдайды заң жүзінде негіздемек болды. Нұрсұлтан Назарбаевтың 2021 жылғы қарашада өткен Astana Club жиынында 92 жастағы Махатхир Мохамадты мысалға келтіріп, өзінің Ақордаға қайтып келуі мүмкін екенін мәлімдеуін және бұрынғы президенттің сол жылы желтоқсан айында Санкт-Петербург қаласында өткен ТМД елдерінің саммитіне қатысуын нағыз билік дағдарысына әкеп соқтырған негізгі оқиғалар деуге болады. Соның алдында ғана жергілікті бір саясаттанушы оған «Елбасының алтын дәуірін» қалпына келтіру үшін батыл шаралар қабылдау қажеттігін айтып, арандатушылық мазмұндағы хат жолдаған еді.

Алайда қазір парасаттылық танытып, Нұрсұлтан Назарбаевтың Қазақстанға сіңірген тарихи еңбегін лайықты бағалау керек. Мен Президент ретінде мемлекет мүддесін басшылыққа алуға, ел бірлігін бәрінен биік қоюға міндеттімін.

Сіздің сұрағыңызға келсек, қазір біз шамамен айына бір рет телефон арқылы сөйлесіп тұрамыз.

– Жақында тұңғыш президенттің Мәскеуге барып, Владимир

Путинмен кездесуін жұртшылық сан-саққа жүгіртті. Биліктен

кеткеннен кейін бес жылдан соң бұлай жүздесудің ақылға

сыймайтыны айтылды.

Қазақстанда алдағы уақытта

Президент сайлауы өтеді-міс деген

болжамдар да пайда болды. Мұндай

кездесу кімге және не үшін қажет,

бұған кім бастамашы болды? Сіздің

пікіріңізді білсек.

– Нұрсұлтан Назарбаев пен Владимир Путиннің желтоқсандағы кездесуі өткен жылдағы екінші жүздесуі ғой деймін. Күз басындағы бірінші кездесу туралы бұқаралық ақпарат құралдарында айтылған жоқ. Олар байырғы достар әрі әріптестер ретінде жүздесетін болса керек, ортақ әңгімелері де бар шығар. Мұндай кездесулер әдетте Нұрсұлтан Әбішұлының бастамасымен өтеді. Ол үшін мұның маңызы зор. Бұрынғы Қазақ КСР Министрлер Кеңесінің төрағасы, партия басшысы және егемен Қазақстанның президенті ретінде Нұрсұлтан Әбішұлының Кремльмен тығыз моральдық және саяси байланысы барын естен шығармаған жөн. Оның талай уақыты Мәскеуде өтті, сан мәрте іссапарға барды, съезд және пленум отырыстарына қатысты, жұмыс бабымен және ресми сапарлармен де болды.

– Сіз «Заң мен тәртіп» қағидасы

туралы жиі айтасыз. Кейбіреулер

мұны қоғамға «қылбұрау салу» деп

қабылдап жатыр. Бұған не айтар

едіңіз?

– «Заң мен тәртіп» қағидасы құқық қорғау саласына ғана арналған деп тұжырымдаған дұрыс болмайды. Мен бұл қағиданы тереңірек түсінемін. «Заң мен тәртіп» – мемлекеттік құрылыстың басты қағидаты. Бұл ретте жазалау шараларын қолдану арқылы қоғамға жаппай бақылау орнату туралы айтып отырған жоқпыз. «Заң мен тәртіп» қағидаты – шын мәнінде кемел демократияның тірегі, құқықтық мемлекеттің негізі. «Заң мен тәртіпке» бағынбасақ, құқық нормаларына құрметпен қарамасақ, Әділетті Қазақстанды құрып, оны өркендеген мемлекет ете алмаймыз.

Сондықтан біздің міндетіміз – бұл қағидатты еліміздің құндылықтар жүйесіне барынша кіріктіріп, халық болмысының, қоғам өмірінің ажырамас бөлігіне айналдыру. «Заң мен тәртіпті» берік орнықтыру үшін көп уақыт пен күш-жігер қажет екенін түсінемін. Себебі бәрі бірдей бұл қағидатты қатаң ұстануға, оны өмір салтына айналдыруға әлі дайын емес. Бірақ талаптанған адам қалайда мұратына жетеді.

– Талғардағы қылмыстық оқиға

ел ішінде үлкен дүрбелең тудырды.

Жұртшылық Сіздің осы жағдайға

қатысты пікіріңізді білгісі келеді.

– Қайталап айтамын, елімізде «Заң мен тәртіп» қағидаты мызғымастай орнығуға тиіс. Мен Талғар оқиғасына дейін жариялаған Жолдауымда құқық қорғау органдарынан қылмыс пен қарақшылықтың тамырына балта шабуды талап еттім.

Қаңтар оқиғасы кезіндегі жаппай тәртіпсіздікті қылмыстық топтар жасағанын естен шығармаған жөн. Мемлекет ұйымдасқан қылмыспен ымырасыз күрес жүргізуге шамасы жететінін соңғы екі жылда анық көрсетті. Аса қауіпті қылмыстық топтар әшкереленіп, құрықталып жатыр. Олардың сыбайластары мен қаржы көздері де анықталып отыр. Былтыр 246 адам қылмыстық жауапкершілікке тартылды. Оның ішінде ұйымдасқан қылмыстық топтардың 30 басшысы бар. Бұл жұмысты мен ерекше бақылауда ұстап отырмын.

Талғардағы оқиғадан кейін құқық қорғау органдары қажетті шаралардың бәрін қабылдады. Күдіктілер қамауға алынды. Тергеп-тексеру жұмыстары аяқталуға жақын. Көп ұзамай осы іске қатысты сот болады. Бұл оқиғаға орай құзырлы органдар қабылдаған барлық шара заң талаптарына толық сай келеді. Ал басқаның бәрі – құрдақырт пен теріс пиғылды кейбір топтардың осы жағдайға саяси сипат беруге деген ұмтылысы ғана. Бұған жол беруге болмайды.

Осы оқиғаға қатысы бар азаматтар бойынша мына мәселені еске салғым келеді. Қазақ халқы шетелден келген отандастарын «қандасым» деп, құшақ жая қарсы алды. Тарихи Отанына оралғандар Қазақстанның заңдарына қатаң бағынып, қоғамдық тәртіпті сақтап, заңсыз әрекеттерден аулақ болуы керек. Олар бұрын өздері тұрған елде биліктің талабын сақтап, ондай әрекет жа-

саған жоқ қой?!

– Былтыр көптеген заңнамалық жаңалық болды. Қабылданған

заңдардың ішінен қайсысы маңыз-

дырақ деп ойлайсыз?

– Маңызсыз заң деген болмайды, заңның бәрі маңызды. Сауалыңызға жауап ретінде мен өзімнің Жолдауларымда және Ұлттық құрылтайдың отырыстарында бастамашылық етіп, қабылдануына түрткі болған бірқатар заңды атап өтейін. Ол заңдар қоғам өкілдерінің, сарапшылардың белсене қатысуымен әзірленді және сонысымен маңызды. Осының өзі мемлекет пен азаматтық қоғамның заңнамаларды жетілдіру жолында тиімді серіктестік орната алатынын көрсетеді. Мысалы, Әйелдердің құқығын қорғауға және балалардың қауіпсіздігін қамтамасыз етуге арналған заң қабылданды. Бұл құжатта тұрмыстық зорлық-зомбылық сияқты, турасын айтқанда, масқара әрекеттердің тамырына балта шабу көзделген. Әйелдер мен балаларға қатысты қандай да бір зорлық-зомбылық жасағандарға жаза күшейтілді. Оған қоса, жас балаларды өлтірген немесе зорлаған адам өмір бойы бас бостандығынан айырылатын болды. Кәмелетке толмағандарды басынып, мазақ қылғандар енді әкімшілік жауапкершілікке тартылады. Бұл талап алғаш рет заң жүзінде бекітілді.

«Келешек» атты бірыңғай ерікті жинақтаушы жүйенің заңнамалық негізін қалыптастыру үшін көп жұмыс атқарылды. Онда жинақталған қаржыны Қазақстанның және шетелдің колледждері мен жоғары оқу орындарында білім алу, сондай-ақ тұрғын үй алу үшін жұмсауға болады.

Азаматтардың үсті-үстіне несие алып, қарызға батуына жол бермеуді көздейтін заң қабылданды. Соған сәйкес несиеcін 90 күннен артық уақыт төлей алмай жүрген адамдарға кәсіпкерлікке қатысы жоқ несие беруге тыйым салынды. Сондай-ақ адамдар несие алуға өзіне өзі тыйым сала алатын болды. Медицина қызметкерлерін құқықтық жағынан қорғау шаралары күшейтілді, оларға берілетін әлеуметтік кепілдіктер жақсарды. Балалар мен жастардың арасында жаппай тарап, нағыз індетке айнала бастаған вейперді сатуға және таратуға тыйым салынды.

Есірткі өндіргені үшін берілетін жаза қатайды. Ондай қылмыс жасағандар 15–20 жылдан бастап өмір бойы бас бостандығынан айыруға дейін жазаланады. Есірткіні белгілі бір жерге тығып кететін курьерлер мұндай қылмысты алғаш рет жасаса және әрекетінің салдары ауыр болмаса, 5 жылдан 8 жылға дейін бас бостандығынан айырылады.

Лудоманиямен күреске қатысты заң күшіне енді. Құжатта букмекерлік кеңселер мен тотализаторлардың жарнамасына едәуір шектеу қойылды, кәмелетке толмағандарды құмар ойынға тартқаны үшін әкімшілік жауапкершілік белгіленді, аты-жөні борышкерлердің бірыңғай тізіміне енгізілген адамдардың құмар ойын ойнауына тыйым салынды. Бұл шаралар талай шаңырақты шайқалтқан, адамдарды қылмыс жасауға, өзіне қол жұмсауға итер-

10 қаңтар 2025 жыл

мелеген ойын-құмарлықтың тарауымен күресуге арналған.

Тағы бір маңызды заңнамалық жаңалық – бұзақылық және вандализм жасаған, біреудің мүлкін қасақана бүлдірген адамдарға берілетін жаза қатайды. Мұның бәрі қоғамдық тәртіпті қамтамасыз ету және заң талаптарына бағынатын азаматтардың құқығын қорғау тұрғысынан маңызды. Сонымен бірге заңнамалық толықтырулардың нәтижесінде 2025 жылдың 1 шілдесінен бастап қылмыстық, әкімшілік және азаматтық істер бойынша үш дербес кассациялық сот жұмыс істей бастайды. Осылайша, азаматтар мемлекеттік органдар тарапынан бұзылған өз құқықтарын қорғай алады.

Былтыр көптеген маңызды заңнамалық бастамалар жүзеге асырылды. Алайда заңның қабылдануы істің басы ғана, сол заңдардың іс жүзінде жұмыс істеуі одан әлдеқайда маңызды екенін түсіну керек. Бұл ретте, заң талаптары қоғамның сұранысына сай болса ғана сақталады. Сондықтан біз биыл да халықтың үміті мен мүддесін және елімізді дамыту жолындағы басымдықтарды негізге ала отырып, құқық қорғау жүйесін жетілдіру жұмыстарын жалғастырамыз.

– Сіз реформалардың үздіксіз

жалғасатынын бірнеше рет

айттыңыз. Ауыл шаруашылығы

еңбеккерлерінің алғашқы

форумында елімізді одан

әрі жаңғырту үшін тың

бастамалар көтеріліп, шешімдер

қабылданатынын аңғарттыңыз.

Бұл қандай бастамалар? Саяси

реформалар жалғаса ма?

– Соңғы бес жыл бойы жүргізілген реформалар–азаматтарымыздың негізгі сұранысы мен мемлекеттің ұзақ мерзімге арналған мүддесіне негізделе отырып мұқият ойластырылған стратегия. Оның саяси астары жоқ.

Негізгі саяси реформалар жасалып бітті. Оның бәрі қоғамда жан-жақты талқыланып, ақырында көпшіліктің қолдауына ие болды. Соның арқасында негізгі саяси институттардың бәрі ашық әрі тиімді бола түсті, билік тармақтары арасындағы тепе-теңдік және теже-мелік жүйе күшейді, ең бастысы, азаматтардың саяси өмірге белсенді араласу мүмкіндігі едәуір артты.

2022 жылғы маусым айында өткен референдумның нәтижесінде Конституция баптарының үштен бірі жаңарғанын қаперге сала кетейін. Мұның өзі реформаның қаншалықты ауқымды екенін көрсетеді. Қазіргі таңда көптеген реформа іс жүзінде жүзеге асырылып жатыр. Біздің бағытымыз айқын, мақсатымыз белгілі. Соған сәйкес, алғашқы нәтижелер де бар. Бірақ реформа – ұдайы жүретін үдеріс. Қоғамда нақты сұраныс болса, жаңа реформалар әзірленеді. Реформалар елді өркендету ісінің ажырамас бөлігі болған, бола да береді.

Мен халыққа Жолдауымды жариялағанда мемлекетімізді одан әрі дамытуға қатысты тың бастамалар ұсынамын. Ұлттық құрылтайдың отырыстарында азаматтардың көкейіндегі өзекті мәселелерге баса

(Жалғасы 7-бетте).

AQTOĞAI AJARY

(Жалғасы. Басы 1-4-5-6 беттерде). назар аударып жүрмін. Биыл да солай болады.

– Қазақстанды парламенттік басқару жүйесіне көшіру үшін іргелі реформа дайындалып жатыр деген ақпарат тарады. Шынымен солай ма?

– Әрине, парламенттік басқару жүйесі де жұмыс жүргізуге қақылы. Бұлжүйе Еуропадағы, тіпті Азиядағы бірқатар елде әбден орнығып, тамырын тереңге жайған. Бірақ биліктің әмбебап формуласы жоқ. Әр мемлекет саяси жүйесін таңдаған кезде төл тарихына, ұлттық болмысына, саяси тәжірибесіне сүйенеді. Менің аппаратым әлемдік тәжірибені мұқият зерделеп жатыр. Посткеңестік елдерде парламенттік басқару жүйесі жақсы қырынан көріне алған жоқ деген пікірге келісесіз деп ойлаймын. Грузиядағы соңғы оқиғалар осы пайымға нақты дәлел бола алады.

Мемлекеттік биліктің саяси жүйесін таңдау – айрықша жауапты шешім. Мұндай шешімдер үркердей топтың оңаша басқосуында емес, тек қана жалпыхалықтық референдумда қабылдануы керек. Менің «Күшті Президент – Ықпалды Парламент – Есеп беретін Үкімет» атты тұжырымдамам Қазақстанның саяси жүйесіне ең қолайлы тұжырымдама екеніне сенімдімін. Бірақ оны толығымен жүзеге асыру үшін біз әлі талай жұмыс істеуіміз керек. Президенттік басқару тәсілі Қазақстан үшін қазір де, таяу кезеңде де ең ұтымды тәсіл деп сенемін.

Мемлекетіміздің тұрақты әрі орнықты дамуына зияны тиетін шешім қабылдауға менің де, сіз бен біздің де еш қақымыз жоқ. Мұндай мәселеге байланысты қателікке жол беруге болмайды. Түптеп келгенде, Конституцияға енгізілген өзгерістің бәрі – Парламенттің реформалануы, ауыл, аудан және қала әкімдерінің сайлануы, Ұлттық құрылтайдың құрылуы және, ең бастысы, заң үстемдігінің басымдыққа айналуы – осының барлығы саяси тоқырауға ұшырамауға сенімді кепілдік береді.

– Елімізде мерзімінен бұрын парламент сайлауы бола ма? Бұл туралы қазір жиі айтыла бастады.

– Мұндай болжамдар бар екенін білемін. Бұл ақпарат әдейі таратылып жатыр деп ойлаймын. Біздің елде жаңа Үкімет жұмысына кіріскен бетте оның отставкаға кететіні туралы әңгіме тарайды. Парламент туралы да дәл солай деуге болады. Мен Парламент депутаттары азаматтық және саяси жауапкершілік танытып, жақсы жұмыс істеп жатыр деп ойлаймын. Ал Үкімет – ауыс-түйіске бейім құрылым. Оның құрамында түрлі жағдайға, оның ішінде «Amanat» партиясының және Парламенттегі басқа да партиялардың ұстанымына байланысты өзгерістер болуы мүмкін.

Меніңше, Парламент сайлауын мерзімінен бұрын өткізуге әзірге еш негіз жоқ. Сайлау заңда белгіленген мерзімдерге сәйкес өтеді. Парламент өзіне тиесілі мерзім аясында қызметін атқаруға құлықты. Ал Үкімет бекітілген бағдарламалар мен жоспарларға сәйкес әрекет етіп, оң нәтижеге жету үшін жұмыс істеп жатыр.

Стратегиялық міндет – тұрақты әлеуметтік-экономикалық дамуды қамтамасыз ету, еліміздің өңірдегі көшбасшы мәртебесін нығайту.

– Әркім өзінің жеке басының жағдайына қатысты мәселелерге көбірек мән береді. Таяу арада азаматтардың талап-тілегіне, қалауына сай келетін қандай жобалар қолға алынбақ?

– Біздің реформаларымыздың, экономиканы дамыту үшін қабылдап жатқан шараларымыздың бәрі азаматтардың әл-ауқатын жақсартуды, тұрмыс сапасын арттыруды көздейді. Басқа мақсат жоқ, бұл – Үкіметтің ең басты міндеті.

Былтыр жазда 2029 жылға дейінгі Ұлттық инфрақұрылым жоспары қабылданғанын қаперіңізге сала кетейін. Онда жалпы инвестиция көлемі 40 триллион теңгеден асатын 200-ден астам жобаны жүзеге асыру қарастырылған.

Биыл ұзындығы 836 шақырым болатын «Достық – Мойынты» темір жолының екінші желісі салынып бітеді. Бұл жоба еліміздің көлік-транзит инфрақұрылымын түбегейлі өзгертеді. Осы бағыттағы темір жолдың жүк тасымалдау мүмкіндігі 5 есе артады, контейнер пойыздары жүкті бұрынғыдан едәуір жылдам жеткізетін болады. Бір айта кетерлігі, мұндай ауқымды жоба алғаш рет өз жобалаушыларымыздың, инженерлеріміз бен құрылысшыларымыздың күшімен жүзеге асырылды. Сондай-ақ Алматы бекетін айналып өтетін темір жолдың құрылысы аяқталады. Бұл жоба Алматы темір жол торабына түсетін салмақты едәуір азайтып, жүк жеткізу мерзімін қысқартады. Жолаушылар тасымалының сапасын арттыру үшін вагондар жаңартыла береді. Биыл энергетика саласында жалпы қуаты 600 мега-ваттан асатын ірі жобаларды жүзеге асыру жоспарланған. «Жасыл энергетика» саласы да зор серпінге ие болады. Шетел инвесторларымен жел, күн және су электр стансаларын салу туралы келісімдеріміз бар.

Теңіз кенішін келешекте кеңейту жобасының құрылысы аяқталады. Мұнай өңдеу, мұнайгаз-химия саласын дамыту ісіне баса назар аударылады. Атап айтқанда, Ақтау битум зауытының өндірістік қуаты арта түседі. «Талдықорған – Үшарал» магистралды газ құбыры, «Жаңаөзен – Ақтау» газ құбырының төртінші желісі, сондай-ақ Атырау облысындағы автоматтандырылған газ тарату стансасы пайдалануға беріледі.

Машина жасау саласын дамыту жұмыстары да жалғасады. Әлемге әйгілі брендтерге тиесілі автокөліктер құрастыратын жаңа өндіріс орындары іске қосылады. Қостанайда іштен жану қозғалтқышына қажетті шойын құймалар және жетекші белдемнің бөлшектері шығарыла бастайды.

Экономиканың дамуына зор серпін беретін ірі инфрақұрылым нысандарын салуға Ұлттық қордың қаражатын жұмсауға болады, дұрысы, жұмсау қажет деп санаймын. Бұл қор ақшаны шетелдің қаржы институттарында қаттап-шоттап сақтау үшін емес, осындай мақсаттарға жұмсау үшін құрылған

жоқ па?!

Мемлекет тұрғын үй құрылысы саласын одан әрі дамыту, баспаналарды қолжетімді ете түсу үшін шаралар қабылдайды. Кезекте тұрғын үймен қамтамасыз ету үшін тиісті жұмыс жалғасады. 2029 жылға дейін жыл сайын 10 мың адам осындай баспанаға ие болады деп жоспарланған. Мен жақында тұрғын-үй саясатына қатысты түзетулер енгізілген заңға қол қойдым. «Отбасы банкі» баспанаға мұқтаж адамдарды «бір терезе» қағидаты бойынша тізімге алумен және оларға баспана бөлуден айналысатын толыққанды даму институтына айналады.

Әлеуметтік инфрақұрылымды дамыту мәселесіне де баса назар аударылады. Ауылдағы денсаулық сақтау жүйесін жаңғыртуға арналған ұлттық жобаның аясында ауылдық жерлерде медицина нысандарын салу жұмыстары жалғасады. Елімізде 460 мың оқушыға арналған 217 жайлы мектеп салу жоспарланған. Оның 105-інің құрылысы аяқталды. Мақсатымыз – апатты жағдайдағы және үш ауысыммен оқытатын мектептер мәселесін, сондай-ақ мектептегі орын тапшылығына қатысты түйткілдерді толығымен шешу.

Бір ай бұрын 2025–2027 жылдарға арналған Республикалық бюджет қабылданды. Құжатта әлеуметтік бағыт басты басымдық ретінде сақталды. Онда денсаулық сақтау, білім беру саласына және әлеуметтік қажеттіліктерге өте қомақты қаржы қарастырылған.

– Цифрландыру ісін қолға алып, жасанды интеллектіні енгізбесек, халықтың тұрмыс сапасын жақсарту мүмкін емес екені қазірдің өзінде түсінікті. Еліміз болашақта осы салада не істей алады?

– Азаматтарымыз мемлекет тарапынан көрсетілетін қызметтерді цифрландыру ісінің артықшылықтарын жақсы біледі. Электронды үкімет сайтындағы қолжетімді қызметтердің тізімі үнемі толықтырылып келеді. Біріккен Ұлттар Ұйымының рейтингісінде Қазақстан E-government-ті дамыту көрсеткіші бойынша әлемде 24-ші орын иеленді. Бұл – тәуір нәтиже, бірақ оған тоқмейілсіп, арқаны кеңге салуға болмайды. Көрсеткіштерді барынша жақсарту керек. Мен мұны Үкіметке жиі айтып отырамын. Бұдан бөлек, еліміздегі банктер де адамдардың күнделікті тұрмыс-тіршілігін едәуір жеңілдету түсу үшін өздерінің цифрлық экожүйесін қалыптастырып жатыр.

Қазақстаннан экспортталатын IT-қызметтер саны артып келе жатқаны көңіл қуантады. Astana Hub табысты жұмыс істеп тұр. Бұл технопарк бір жарым мыңнан астам компанияның басын біріктіреді. Оның үштен біріне жуығы – шетелдік компания. Осылайша, еліміз жаһандық цифрлы көшпенділер үшін қолайлы мемлекетке айналып келеді.

Қазақстан Еуразия кеңістігіндегі ең ірі цифрлы хабтың бірі бола алады. Оған мүмкіндігіміз толық жетеді. Ол үшін жасанды интеллект технологияларын дамыту керек. Болашағы зор жобалар қазірдің өзінде бар. Мысалы қазақ тілінің

10 қаңтар 2025 жыл

KazLLM атты цифрлы тіл моделінің алғашқы нұсқасы жасалды. Бұл – қазақ тілінде ойлап, сараптама жасап, қазақша сөйлесе алатын жасанды интеллект. Осы бағыттағы жұмыстар жалғаса береді.

Жыл соңына дейін жасанды интеллектінің Alem.AI атты халықаралық орталығы ашылады. Бұл орталық инвестиция тартатын, әлемдік тәжірибені және инновацияларды енгізетін орынға айналуы керек.

Таяу жылдарда жасанды интеллект өте қарқынды дамып, жұрттың өмір туралы ұғымын, тіпті тұрмыс-тіршілігін де түбегейлі өзгертетінін ескерген жөн. Милы машиналар, яғни интеллектісі жағынан адамды он орайтын роботтар пайда болатын күн алыс емес. Оның үстіне бұл роботтар эмпатияға, яғни сезіну және эмоция білдіру сияқты адамға тән қасиеттерге ие болады.

Жастарға мектептерде, колледждер мен жоғары оқу орындарында жасанды интеллект технологияларын қолдана білуді үйрету маңызды. Былтыр еліміздің 15 университетінде Google компаниясының жасанды интеллект жөніндегі курстары енгізілді. Осы саланың мамандарын даярлау үшін арнайы бағдарлама әзірлеу мәселесі пысықталып жатыр (AI-Sana).

Нейрожүйелердің пайдасы ұшан-теңіз болғанымен, одан туындайтын қатерлер де бар. Мысалы, алаяқтар фото-бейнежазбалар жасап, адамның дауысын келтіру үшін де соны пайдаланады. Сондықтан көптеген мемлекет жасанды интеллект технологияларының қолданылу аясын заңмен реттеуге кірісті.

Біздің депутаттарымыз да жасанды интеллект туралы заң әзірлеу керек деп бастама көтерді. Осы маңызды жұмыспен тиянақты түрде, мұқият айналысу қажет. Жасанды интеллектіні жауапкершілікпен қолдану қағидаларын жасап, оның этикалық мәселелерін жан-жақты ойластыру керек. Бірақ осы саланы реттегенде жасанды интеллектіні шектеуге емес, керісінше, оны дамыту жағына мән берілуге тиіс. Бұл технологияларды кеңінен қолданысқа енгізу орасан зор мүмкіндіктерге жол ашады. Оны қалт жібермей, игілікке жарату қажет.

– Сіз бизнесті қолдау мәселесіне ерекше мән бересіз.

Инвесторлармен, кәсіпкерлермен кездесесіз. Еліміздегі кәсіпкерліктің даму үрдісіне көңіліңіз тола ма?

– Мен инвестиция және бизнес саласындағы ахуалды жақсартуға, кәсіпкерлік бастамаларды қолдауға айрықша назар аударамын. Күздегі Жолдауымда Үкіметке осыған қатысты нақты тапсырмалар бердім. Былтыр сәуірде кәсіпкерлерге қолайлы жағдай жасау үшін бизнесті жүргізу мәселесіне қатысты заң қабылдадық. Қазір мемлекеттік бақылау жүйесін ретке келтіріп жатырмыз. Бұрынғыдай заңсыздықтарды тексеруге емес, оның алдын алуға көбірек басымдық беріліп отыр. «Басынан бастап реттеу» тәсілі енгізіліп жатыр. Кейбір экономикалық қылмыстар қылмыс санатынан шығарылды, экономикалық құқық (Жалғасы 8-бетте).

AQTOĞAI AJARY

(Жалғасы. Басы 1-4-5-6-7 беттерде).

бұзушылықтың 29 түрі бойынша қамауға алу жазасын қолдануға тыйым салынды. Мұның бәрі кәсіпкерлердің мүддесі үшін жасалды.

Мемлекет субсидия, жеңілдетілген несие және кепілдендірілген қарыз беру арқылы шағын және орта бизнеске қолдау көрсетіп отыр. Шағын және орта бизнестің ел экономикасындағы үлесі үздіксіз артып келеді. Бүгінде осы бизнестің өкілдері 4,3 миллион адамға, яғни еңбек етіп жүрген азаматтардың тең жартысына жуығына жұмыс тауып беріп отыр. Сондықтан кәсіпкерлік бастамалар ел экономикасының негізгі қозғаушы күшіне айналып келеді деп сеніммен айтуға болады.

Мемлекет ірі бизнесті де дамытуға мүдделі. Осындай кәсіпкерлердің әлеуметтік жауапкершілігі де, жергілікті қауымдастықтармен ұзақ мерзімге арналған серіктестік қатынас орнатуға деген құлшынысы да зор. Бұл – қуанарлық жағдай. Мемлекет пен бизнестің ықпалдастығы арқылы көптеген әлеуметтік мәселе шешімін тауып жатыр.

Қазақстанда өз жұмысына жаңа технологияларды енгізіп жүрген озық ойлы кәсіпкерлердің жаңа буыны пайда болды. Мұндай кәсіпкерлер әлемдік бәсекеге түсуге де қабілетті. Қазір шетелдік бизнестің Қазақстанда өз өкілдігін ашып жатқаны да көңіл қуантады. Бұл жағдай отандық нарыққа халықаралық сипат беруге, әділ бәсекені күшейтуге және экономиканы әртараптандыруға ықпал етеді. Осы орайда, Үкімет жанынан құрылған Инвестициялық штаб «бір терезе» қағидатына сай әрекет етіп, шешімдер қабылдап, өзіне жүктелген міндетті толық атқарып жатқанын атап өткен жөн.

Мемлекеттің инвестициялық ахуалды жақсарту жолындағы жұмысы жемісін беріп жатыр. Жақында Біріккен Ұлттар Ұйымының Азия мен Тынық мұхит елдеріне арналған экономикалық және әлеуметтік комиссиясы инвестиция жөніндегі баяндамасын жариялады. Онда Қазақстанның 2024 жылы жаңа жобаларға 15,7 миллиард доллар көлемінде тікелей шетел инвестициясын тартқаны көрсетілген. Бұл оның алдындағы жылмен салыстырғанда 88 пайызға артық. Біз Солтүстік және Орталық Азиядағы ең жоғары көрсеткішке қол жеткізіп отырмыз. Аймақтағы шетел инвестицияларының үштен екісіне жуығы, яғни 63 пайызы Қазақстанның еншісінде.

Мен бизнес өкілдерімен, инвесторларменалдағыуақыттадакездесетін боламын. Олардың жасампаз бастамаларын қолдаймын. Үкімет пен барлық мемлекеттік органдардан да осыны, яғни бизнеске құлақ асып, онымен үйлесімді жұмыс жүргізуді, болашағы зор жобаларға қаржы салатын кәсіпкерлер мен инвесторларға қолдау көрсетуді талап етемін. Бизнеске мүлде қысым көрсетілмеуі керек. Шенеуніктер мен күштік құрылымдардың қызметкерлерін мұндай әрекеттері үшін жазалап жатырмыз, алдағы уақытта да жауапкершілікке тартатын боламыз. Ал кәсіпкерлер алаяқтық жасамай, заң аясында жұмыс істеуге тиіс.

8

– *Қоғамда сыбайлас жемқорлық туралы жиі айтылады. Оған қарсы белсенді күрес жүргізіліп жатқанын көріп отырмыз. Жалпы, шенеуніктердің ұсталғаны туралы түрлі ақпараттар елімізде жемқорлық өршіп тұрғандай әсер қалдырады. Шынымен де солай ма?*

– Сыбайлас жемқорлықпен жүйелі түрде күресу – аса қажетті жұмыс. Бұған еш күмән жоқ. Мемлекет жемқорлыққа қатысты құқық бұзушылық фактілерін анықтау ғана емес, жемқорлықтың алдын алу үшін жұмыс жүргізіп жатыр.

Қазақстан жемқорлыққа қарсы күрес жолында ең озық халықаралық стандарттарды, соның ішінде Экономикалық ынтымақтастық және даму ұйымы енгізіп жатқан талаптарды басшылыққа алады. Бұл – өте жоғары талап, біз соған сай болуымыз керек. Бұған қоса, мен сыбайлас жемқорлықпен күресуге жауапты мекеменің басшыларына науқаншылдыққа салынбай, байыпты шешімдер қабылдау қажеттігін үнемі айтып отырамын. Өйткені әрбір шешімнің артында адам тағдыры тұр.

Ал шенеуніктердің ұсталғаны туралы ақпараттың жиі шығуы биліктің абыройына белгілі бір деңгейде нұқсан келтіргенімен, мемлекеттің ашық жұмыс істейтінін көрсетеді. Бірақ мұндай қадамсыз «Заң мен тәртіп» қағидаттарына негізделген әділетті мемлекет құру мүмкін емес.

– *Қазақстан мен Ресейдің арасында ежелден тығыз экономикалық және мәдени-гуманитарлық қатынас орныққан. Былтыр қараша айында Ресей Федерациясының Президенті Владимир Путин Қазақстанға мемлекеттік сапармен келді. Бұл сапар біздің елде де, шетелде де жұрттың жіті назарында болды. Сондағы келіссөздердің нәтижесін қалай бағалайсыз?*

– Ресей Президентімен өткізген келіссөздер аса мазмұнды болды. Біз сауда-экономика, көлік-логистика, энергетика, мәдениет, білім беру және басқа да салалардағы ынтымақтастық мәселелерін жан-жақты талқыладық. Астанаға Ресей Үкіметі мүшелерінің жартысына жуығының келуі Ресей үшін Қазақстанның стратегиялық маңызы жоғары екенін көрсетеді.

Келіссөздердің нәтижесі туралы көп жазылды, көп айтылды. Әрине, біраз дүние ақпарат құралдарына шыққан жоқ. Владимир Путинмен бейресми жағдайда төрт сағат әңгімелестік. Бұл кездесуде екі жақты ынтымақтастықты одан әрі нығайтуға мүмкіндік туды. Сондай-ақ әңгіме барысында халықаралық проблемалар бойынша өзара түсіністігіміз бекемделе түсті. Мен Қазақстанның көп жақты саясатының мәнін ашық айтып, Ресеймен стратегиялық серіктестігімізді және одақтастық қарым-қатынасты дамыту туралы ұстанымға берік екенімізді жеткіздім.

Президент Путин – тәжірибелі мемлекет қайраткері. Ол Қазақстанның ерекшелігін және Орталық Азия аймағындағы ең ірі экономикасы бар маңызды ел екенін жақсы түсінеді. Сондықтан Ресей біздің елмен сауда-экономикалық және

9

инвестициялық байланыстарын нығайту үшін белсенді жұмыс жүргізіп жатыр. Басқаша болуы да мүмкін емес. Себебі екі ел арасын құрлықтағы ең ұзын үздіксіз шекара қосып жатыр.

Владимир Путиннің шетелге сапарының ең көбі біздің елге жасалғаны, яғни оның Қазақстанға 33 рет келгені де көп жайттан хабар береді. Бұдан бөлек, біз телефон арқылы сөйлесеміз, халықаралық форумдар аясында кездесеміз. Бір сөзбен айтқанда, үнемі хабарласып отырамыз.

Мұның бәрі Қазақстанға да, Ресейге де қажет. Өйткені бұл екі ел басты рөл атқаратын Еуразия кеңістігіндегі тұрақтылықты қамтамасыз ету үшін керек.

– *Сіз Атом энергетикасына қатысты референдум кезінде ақпарат құралдарының алдында сөз сөйлеп, атом электр стансасын салуға озық технологиясы бар шетел компаниялары тартылады дедіңіз. Халықаралық консорциум құрылатын болды. Үкімет қай компанияларға басымдық беретінін айқындады ма?*

– Владимир Путиннің Астанаға сапары кезінде бұл мәселе де талқыланды. Жобаға тапсырыс беруші ретінде Қазақстан жағы Консорциумда бас оператор болады деп уағдаластық. Атом стансаларын салуға байланысты шетелдерде тәжірибесі мол, білігі жоғары «Росатом» компаниясының жобаға қатысуы мүмкін екені айтылды. Сондай-ақ Қытайдың азаматтық мақсатта қолданылатын ядролық нысандар салу ісіндегі зор жетістіктері ескеріле отырып, осы елдің компаниясымен де келіссөз жүргізіліп жатыр. Жобаға басқа да мемлекеттердің, оның ішінде Батыс елдерінің корпорациялары қызығушылық танытып отыр.

Биыл конкурстық рәсімдер өткізіледі. Содан кейін Үкімет түпкілікті шешім қабылдайды. Қазақстанға қуатты атом стансасы қажет екені анық, мен бұған сенімдімін. Оған қоса, таяу арада екінші, тіпті үшінші атом электр стансасын салуымыз мүмкін екенін жоққа шығармаймын. Ядролық өнеркәсіп саласы қазірдің өзінде энергетика тапшылығына тап болып отырған экономикамызды өркендетуге зор серпін береді. Қазақстан ядролық энергетикасы дамыған елге айналуы қажет деп санаймын. Оның болашағы зор.

– *Қытай Халық Республикасының Төрағасы Си Цзиньпиннің елімізге жасаған мемлекеттік сапары өткен жылдың тағы бір маңызды оқиғасы болды. Сондағы келіссөздердің басты нәтижесі қандай? Ақпарат құралдарында Төраға Си екеуіңіздің ел үкіметтеріне өзара сауда айналымын екі есе арттыру жөнінде міндет жүктегендеріңіз айтылды. Бұл қол жеткізуге болатын меже ме?*

– Қытай Халық Республикасының Төрағасы Си Цзиньпиннің біздің елді жақсы білетінін, қазақ халқына ілтипатпен қарайтынын атап өткен жөн. Біз екі жақты қарым-қатынасқа, өңірлік және халықаралық ахуалға қатысты барлық мәселені емен-жарқын талқыладық. Ешқандай

10 қаңтар 2025 жыл

көз-қарас қайшылығы жоқ. Қытай үшін Қазақстан – аса маңызды стратегиялық серіктес. Қарқынды әрі жан-жақты дамып келе жатқан қазақ-қытай ынтымақтастығы, шын мәнінде, мәңгі стратегиялық серіктестік деңгейіне жетті. Мұның Қазақстан мүддесіне сай келетіні сөзсіз.

Қазақстанға жасаған мемлекеттік сапары кезінде Төраға Си Цзиньпин Қытайдың елімізге ешқашан зиянын тигізбейтінін, біздің егемендігіміз бен тәуелсіздігімізді барынша қолдайтынын атап өтті. Бұл – өте маңызды мәлімдеме.

2023 жылы Қазақстан мен Қытай арасында өзара визасыз режим орнатылды. Жаңа бастама алыс-берісті дамытуға және екі халықтың достығын нығайтуға оң әсерін тигізіп жатыр. Қазақстан азаматтары Қытайды жаңа қырынан танып, оның технологиялық тұрғыдан алып мемлекетке айналғанына көз жеткізе бастады. Қытай жұрты да біздің отандастарымызға достық пейіл танытып отыр.

Қытаймен жан-жақты ынтымақтастықты одан әрі дамыту қазақ дипломатиясындағы маңызды міндеттің бірі болып қала береді. Бұл мемлекет – Қазақстанның негізгі сауда серіктесі, сондай-ақ экономикамыздағы ең ірі инвестордың бірі. Өзара сауда айналымын екі есе арттыруға барлық мүмкіндік бар. Ең бастысы, екі ел басшыларының саяси ерік-жігері жеткілікті. Сондықтан аталған мақсатқа жетуге әбден болады.

Жоғары деңгейдегі диалог 2025 жылы да жалғасады. Төраға Си Цзиньпин «Орталық Азия – ҚХР» саммитіне қатысады деп жоспарланып отыр. Оның Қазақстанға алдағы сапары, сондай-ақ биыл күзде Қытайда өтетін келіссөздер екі елдің сан салалы ықпалдастығын одан әрі нығайтуға септігін тигізеді деп сенемін.

– *Сіз желтоқсанның басында Дональд Трамппен телефон арқылы сөйлестіңіз. Соңғы айларда сарапшылар оның Ақ үйге екінші рет келуі Американың саясатына және әлемдегі ахуалға қалай әсер ететініне қатысты түрлі пікір айтып жүр. Осы орайда қазақ-америка қатынасы таяу жылдарда қалай өрбиді деп ойлайсыз? Оған АҚШ-тың Қытаймен және Ресеймен күрделі қарым-қатынасы әсер етпей ме?*

– Иә, Президент Дональд Трамппен мазмұнды әрі ашық әңгіме болды. Ол Қазақстанға АҚШ-тың маңызды стратегиялық серіктесі ретінде жақсы қарайтынын сеніммен айта аламын. Біз жоғары деңгейде жұмыс бабындағы байланыста боламыз деп уағдаластық. Трамп және оның командасы халықаралық саясатқа жаңа көзқарастар орнықтырып, тың тәсілдер енгізумен айналысады. Мұның бәрі әлемдегі ахуалға ықпал етері анық.

Мен қазақ-америка қарым-қатынасын нығайтуға өткен ғасырдағы 90-шы жылдардың ортасынан бері атсалысып келемін. Өзара ықпалдастықты нығайту жолындағы отыз жылдан астам уақытта басымдықтарға, яғни сауда-экономика, инвестиция са-

(Жалғасы 9-бетте).

AQTOĞAI AJARY

(Жалғасы. Басы 1-4-5-6-7-8

беттерде).

ласындағы ынтымақтастыққа, ядролық қаруды таратпау және қауіпсіздікті сақтау мәселелеріне қатысты ортақ ұстаным қалыптасты. Ақүйдің жаңа басшылығымен бірлесе атқарылатын жұмысқа да осы мәселелер арқау болады.

Телефонмен сөйлескенде Дональд Трамп Украинадағы әскери іс-қимылды тоқтатуға қатысты біздің пікірімізді сұрады. Бұл – мен үшін тың тақырып емес. Өйткені 2024 жылы мемлекеттер мен халықаралық ұйымдардың көптеген басшысы менен осы жөнінде сұраған болатын. Ерекше жағдай қалыптасып отыр: Ресей әскери тұрғыдан жеңілмейді, ал Украина Батыстағы одақтастарының көмегімен соғыста беріспей, тым болмағанда жеңіліп қалмаудан үміттеніп отыр. Сондықтан бұл мәселенің айрықша күрделі екенін, оның шешімі қақтығысып жатқан екі ел басшыларының ерік-жігеріне және әлемдік держава көшбасшысы ретінде Трамптың өзіне де байланысты екенін айттым. Қазақстан Украинада әскери іс-қимыл басталған сәттен-ақ бейбітшілік орнату үшін келіссөздер жүргізу қажеттігін айтып келе жатқанын атап өттім.

Біз еш жерде ара ағайын атануға өзіміз сұранып, ұмтылмайтынмызды қадап айтуға тиіс-пін. Халықаралық аренада Қазақстанның әлеуеті мен мүмкіндіктеріне қарай әрекет жасаймыз. Бірақ халықаралық мәселелердің шешілуіне жәрдемдесуге әрдайым дайынбыз. Әрине, халықаралық аренадағы күрделі ахуал біздің белгілі бір елдермен сауда және саяси қарым-қатынасымызға салқынын тигізеді. Сондықтан біз сыртқы үрдістердің жағымсыз ықпалын азайтуға тырысамыз. Қазақстан мүдделі мемлекеттердің бәрімен өзара тиімді прагматикалық байланыс орнатуды көздейді.

– *Түркі елдері ынтымақтас-тығының аясы үздіксіз кеңейіп келеді. Былтыр Қазақстан Түркі мемлекеттері ұйымының төрағасы ретінде бауырлас елдердің байланысын бекемдеуге едәуір үлес қосты. Түркі әлемінің алдағы ықпалдастығы жолында Қазақстан қандай рөл атқарады деп ойлайсыз?*

– Қазақстан Түркі мемлекеттері ұйымының бастауында болды. Осы ұйымға мүше елдер – біздің көршілеріміз әрі маңызды геосаяси серіктестеріміз.

Біз төрағалық еткен кезде саяси және сауда-экономикалық, көлік-логистикалық, мәдени-гуманитарлық салалардағы ынтымақтастықты кеңейтуге баса мән бердік. Бірқатар ауқымды жобаны жүзеге асырдық, 80-нен астам іс-шара ұйымдастырып, нақты нәтижеге қол жеткіздік. Астанада V Дүниежүзілік көшпенділер ойындары өтті. Оқу орындары мен академиялық құрылымдардың, шығармашылық зиялы қауым өкілдерінің арасында тығыз байланыс орнады. 2021 жылы түркі әлемінің рухани астанасы болып жарияланған көне Түркістан қаласы халықтарымыздың достығын нығайту ісінде айрықша рөл

атқарады.

Соңғы 10 жылда Түркі мемлекеттері ұйымына мүше елдердің арасындағы алыс-беріс айтарлықтай артты. 2024 жылы өзара сауда-саттық көлемі 45 миллиард доллардан асты. Елдеріміз Транскаспий халықаралық көлік дәлізінде маңызды рөл атқарады. Біз энергетика, өнеркәсіп, ауыл шаруашылығы, цифрландыру салала-рындағы ықпалдастықты күшейтуді көздеп отырмыз.

Қазақстан осы ұйымның төрағасы ретінде «TURKTIME!» ұранын ұсынды. Бұл аббревиатура өзара қарым-қатынастың дәстүр (Traditions), унификация (Unification), реформалар (Reforms), білім (Knowledge), сенім (Trust), инвестиция (Investments), медиация (Mediation) және энергия (Energy) сияқты сегіз басымдығын білдіреді. Осы басымдықтарды Түркі мемлекеттері ұйымы ғана емес, бүкіл түркі әлемі қызығушылықпен қабыл алды. Қазақстан түркі дүниесін біріктіруді көздейтін барлық жасампаз бастаманы қолдайды, Ресейдің «Алтай – түркілердің алтын бесігі» атты тұжырымдамасына да жақсы қарайды. Еліміз түркі халықтары арасындағы байланысты нығайту, сондай-ақ ортақ тарихи-мәдени бай мұрамызды насихаттау ісіне алдағы уақытта да атсалыса береді.

– *Сіз бұған дейін шетелдік сарапшылар мен дипломаттар Қазақстанды орта держава деп атай бастағанын айттыңыз. Орта державалар қандай рөл атқарады және осы мәртебеге ие болған Қазақстан не істей алады?*

– Мен бұған қатысты пікірімді ел ішінде де, шетелдерде де айттым. Қазір халықаралық қатынастар жүйесі кері кетіп барады, тіпті құлдырай түсті деуге болады. Тұрақсыздық күшейіп, ірі державалардың бірін-бірі айыптауы белең алды. Біріккен Ұлттар Ұйымының Қауіпсіздік Кеңесі қауқарсыз болып қалды. Осындай қиын халықаралық ахуалға көптеген мемлекет, соның ішінде Қазақстан да алаңдап отыр. Бұл – орынды алаңдаушылық. Себебі қалыптасқан жағдай ол елдердің тұрақты әлеу-меттік-экономикалық дамуына мүмкіндік бермейді.

Бүгінде барынша әділ әлем қалыптастыруға деген сұраныс өте жоғары. Осы тұрғыдан алғанда, орта державалар халықаралық сенім дағдарысын және жауапкершілігі жоғары жаһандық көшбасшыларға деген тапшылықты еңсеру жолында маңызды рөл атқара алады деп ойлаймын.

Орта державалар күш-жігерін жұмылдырып, жанжалдасып жатқан гео-саяси орталықтардың арасында жаңа әрі мықты дәнекер бола алады. Сол арқылы халықаралық текетірестің қызуын бәсеңдетеді. Мен орта державалар үшін дәл осындай шақ туғанына сенімдімін.

– *Биыл Ұлы Жеңістің мерейлі белесін атап өтеміз. Басқа да көптеген мемлекет сияқты, Қазақстан үшін де бұл датаның символдық мәні зор. Осыған орай қандай іс-шаралар жоспарланып отыр?*

– Биылғы мемлекеттік іс-шаралардың ішінде Ұлы Жеңістің 80 жылдығы ерекше орын алады.

Қазақстандықтар нацизмді талқан-дауға елеулі үлес қосты. Біздің аталарымыз бен әкелеріміз барлық майданда жанқиярлықпен соғысты. Оның үстіне, Қазақстан әскерді қару-жарақпен, өнеркәсіп өнімдерімен және азық-түлікпен қамтамасыз ету ісінде маңызды рөл атқарған сенімді тыл болды.

Мен Ұлттық құрылтайдың Атыраудағы отырысында Жеңістің мерейлі белесін атап өтуге дайындалу қажеттігін айттым. Сол кезде жариялаған бастамаларым қазірдің өзінде жүзеге асты. Мысалы, «Айбын» орденінің үш дәрежесі әйгілі батырларымыз Сағадат Нұрмағамбетовтің, Бауыржан Момышұлының және Рақымжан Қошқарбаевтың есімімен аталатын болды. Қазақстанның әуе қорғанысы күштерінің 604-ші әуе базасына әйгілі ұшқыш, Кеңес Одағының екі мәрте батыры Сергей Луганскийдің есімі берілді. Әлия Молдағұлованың, Мәншүк Мәметова мен Хиуаз Доспанованың өшпес ерлігін міндетті түрде жадымызда жаңғыртамыз.

Жеңісті мерекелеуге арналған жоспарда көптеген іс-шара қамтылған. Оның ең бастысы – Аста-нада өтетін әскери шеру. Соғыс және тыл ардагерлеріне құрмет көрсетіледі, ешкім де елеусіз қалмайды. Концерттер мен көрмелер өтеді, деректі фильмдер мен бағдарламалар түсіріледі, тарихи кітаптар мен фотоальбомдар шығарылады. Жауынгерлеріміздің есімін ел жадында сақтау үшін зерттеу жұмыстары жалғаса береді. Б.Момышұлының – 115, М.Ғабдуллиннің – 110, Ә.Молдағұлованың 100 жылдығы салтанатты іс-шаралар тізіміне кіреді.

Жеңістің биылғы мерекесі Қазақстанның бірде-бір азаматын бей-жай қалдырмайтынына сенімдімін. Өйткені біздің елде сұрапыл соғыстың зардабын тартпаған отбасы жоқ деуге болады. Соғыста қаза тапқандарды ұмытпай, қаһарман ерлеріміздің рухына тағзым ету, ел ішінде бейбітшілік пен тыныштықты сақтау – баршаға ортақ парызымыз.

– *Тағы бір өзекті мәселе бар. Соңғы кезде қазақ тілінің қолданылу аясы едәуір кеңейді. Мемлекеттік тілде еркін сөйлейтін азаматтардың саны көбейді. Бұл қазақ тіліне деген сұраныстың арта түскенін білдіреді. Бұдан бөлек, шетелдіктердің де тілімізді үйренуге деген қызығушылығы күшейді. Қоғамда қазақ тілінің рөлі одан әрі арта түсуі үшін не істеу керек деп ойлайсыз?*

– Иә, дұрыс айтасыз. Қазақ тілінің бәсекеге қабілеті және оны үйренуге деген қызығушылық барынша артып келеді. Ең бастысы, қазақ тілін білу сәнге айналды, жастарымыз оны меңгеруге ұмтылатын болды. Мемлекеттік тіл азаматтардың қызмет бабында өсуіне және табысқа жетуіне жол ашатын маңызды фактор саналады. Еліміздің бизнес өкілдері маркетинг саласындағы науқандарын қазақ тілінде сөйлейтін тұтынушылардың сұранысына қарай өткізетін болды. Мұның бәрі мемлекеттің өте абай болуды қажет ететін әрі саяси тұрғыдан маңызды саналатын осы

10 қаңтар 2025 жыл

саладағы саясаты тиімді жүргізіліп жатқанын көрсетеді.

Сөз арасында айта кетейін, дүние жүзінде 7 мыңнан астам тіл бар. Соның ішінде үш мыңнан астам тілге жойылып кету қаупі төніп тұр. Қазақ тілі бұл топқа кірмейді. Ана тіліміз 2024 жылы әлемде ең кең таралған тілдердің арасында 79-шы орынға тұрақтады. Осы ретте күрделі әрі қарама-қайшылыққа толы кеңес заманында ана тілімізді әлемдік лингвистика картасынан жойылып кетуден сақтап қалған зиялы қауым өкілдерінің, ақын-жазушылардың, журналистер мен ғалымдардың, мұғалімдер мен мәдениет қайраткерлерінің, ауыл еңбеккерлерінің, яғни барша отаншыл азаматтардың еңбегін бағалауымыз керек.

Бұдан да жоғары нәтижеге қол жеткізу үшін ғылым-білім саласындағы инфрақұрылымды жаңғыртуға, мектептер мен басқа да оқу орындарында қазақ тілін үйрету жүйесін жетілдіруге қоса оқытушылардың мәртебесін арттыру мәселесін де шешу қажет. 2023 жылы «Қазақ тілі» қоғамының бастамасымен құрылған арнаулы қорға қолдау көрсету керек. Цифрлық технологияларды қолдануға баса мән берген жөн. Өйткені қазақ тілінің алдағы тағдыры, еліміздің жаһандық бәсекеге қабілеті көбіне осыған байланысты болады.

Шығармашыл жастар және креативті индустрия мемлекеттік тілді дамыту ісіне пайдасын тигізе алады. Мемлекет экономикадағы болашағы зор осы саланың өркендеуіне барынша қолдау көрсетеді. Отандық және әлемдік нарықта қаржылық жағынан тиімді әрі сұранысқа ие болатын түрлі контентті қазақ тілінде жасау қажет. Бұл жерде әдебиет, музыка, кино, сериал және компьютер ойындары туралы айтып отырмын.

Ана тіліміздің болашағы жарқын екеніне менің еш күмәнім жоқ. Қазақ тілі мемлекеттік тіл ретінде хал-қымызды ұйыстыру жолында маңызды рөл атқара береді. Бірақ тіліміздің тұғырын нығайтамыз деп, оны басқа тілдерге, соның ішінде орыс тіліне қарсы қоймау керек.

– *Сіз өз сөздеріңізде жастарға айрықша назар аударасыз. Қазақстан жастарының өзін-өзі дамытуына мол мүмкіндігі бар. Оларға барлық жол ашық деуге болады. Кейбір жастардың құмар ойынға, есірткіге тәуелді болғанын немесе күні бойы еш мақсатсыз әлеуметтік желіде отырып, алтын уақытын босқа өткізіп жатқанын көргенде қынжыласың. Жас ұрпақты саяси жауапкершілігі жоғары әрі жан-жақты дамыған азамат етіп тәрбиелеу үшін не істеу керек?*

– Мен түрлі жиындарда жастарымыз туралы жиі айтамын. Өйткені олардың болашағын ойлап, шын жүректен тілеуестік білдіремін. Еліміздің тағдыры – жастардың қолында. Біз отаншылдығын нақты ісімен көрсететін әрі мәдениеті жоғары ұрпақ өсіруге міндеттіміз. Реформаның бәрін жастардың игілігі үшін жасап жатырмыз. Бұл – әншейін әдемі сөз емес, мемлекет (Жалғасы 10-бетте).

стратегиясының түпкі мәні. Бүгінгі жастар біздің жас кезімізге қарағанда әлдеқайда көп біледі. Қазіргі технология дәуірінде бұл – қалыпты нәрсе. Қазақстанда дарынды, білімді әрі мақсатына ұмтыла білетін қыз-жігіттер көп. Дәл сол себепті мен жастарға сенемін деп жалықпай айта беремін.

Бір ғана тілегім, ақыл-кеңесім бар: жас азаматтарымыз дүниетанымы тұрғысынан жасампаз, ойлау қабілеті жағынан сындарлы болуға тиіс, олар жақсы мен жаманның аражігін ажырата білуі керек. Жастарымыз халқымыздың болмысына жат идеялардың жетегінде кетпесе, күйзеліске түспесе, нигилизмге бой алдырмаса екен деп тілеймін. Олардың белсенді, тәртіпті, білімпаз, еңбекқор болғанын қалаймын.

Тәуелсіздік ұрпақтары қазірдің өзінде ғылым, спорт, бизнес, креативті индустрия және мемлекеттік қызмет саласында зор жетістікке жетіп жүр. Көбі өндірісте және ауыл шаруашылығында табысты еңбек етеді. Бұл ретте мен осы жылды «Жұмысшы мамандықтар жылы» деп жарияладым. Біз еңбек адамының абырой-беделін көтеріп, еңбекқорлық, кәсібилік сияқты құндылықтарды дәріптеу үшін әлі талай шаруа атқаруымыз керек.

Экономиканың көптеген саласында жұмыс қолы жетіспейді. Жұмысшы мамандықтар мол әрі тез табыс табу тұрғысынан қызықтыра қоймауы мүмкін. Бірақ бұл мамандықтардың еңбек нарығында сұранысқа ие болатынына да, қоғамдағы мәртебесі жоғары болатынына да кепілдік бар.

Мен кәсіпорындарды аралаған кезде жастарды жиі жолықтырамын. Олардың арасында жұмысшы әулеттерінің өкілдері көп екені көңіл қуантады. Мемлекеттің міндеті – жас мамандарға материалдық және моральдық жағынан көмектесу. Мен бұл шаруамен үнемі айналысамын.

– *Жастарымыздың білім қуып немесе жұмыс іздеп шетелге шығуына қалай қарайсыз?*

– Рас, бүгінде жастардың көбі білім алу немесе қызметте өсу үшін шетелге шыққысы келеді. Бұл – жаһандану үдерісінің бір ерекшелігі. Оған түсіністікпен қараған жөн.

Біздің жастарымыз әлемдегі беделді университеттерде жақсы білім алып, тәжірибе жинап, дүниетаным көкжиегін кеңейте алады. Сондықтан мемлекет, әрине, шетелде оқуға кедергі жасамайды, керісінше, ондай бастамаларға қолдау көрсетеді. Халықаралық «Болашақ» стипендиясы баршаға белгілі. Жас ғалымдардың шетелдегі ғылыми орталықтарда тағылымдамадан өтуіне жағдай жасалған. Бірқатар елмен студент алмасып тұрамыз.

Жастардың кәсіби біліктілігін көтеру немесе көбірек табыс табу үшін шетелге шығуы қалыпты нәрсе деп ойлаймын. Олар үйреншікті мекенін тастап, өмірін күрт өзгертуден қорықпауы керек. Тіршілікке бейім, ширақ болуға тиіс. Өмір бойы бір ауылда немесе бір қалада тұрып, жарты ай жұмыста болғаны үшін биліктен жоғары жалақы талап ететін заман әлдеқашан келмесе кетті. Қазіргі жастар ондай болмауға тиіс. Қарым-қабілетің қай жерде қажетке жараса, сонда баруға ты-

рысу керек. Баратын жерің ірі шаһар немесе басқа өңір, тіпті басқа ел болуы да мүмкін. Қазақта «Жүргенге жөргем ілінеді, жатқанға жан жуымайды» деген сөз бар.

Азаматтарымыз шетелде жүрсе де, халқымыздың салт-дәстүрі мен мәдениетін дәріптеп, еліміздің абырой-беделін арттыруға атсалысып, Отанына пайдасын тигізе алады. Қазақстан деген брендті әлемге таныту да маңызды миссияның бірі. Дегенмен шетелге шығу «Барсакелмесе» кету деген сөз емес. Ұл-қыздарымыздың жаңа технологияларды меңгеріп, тәжірибе жинақтап, Қазақстанға оралғаны жөн. Елімізде білікті мамандардың аяғын жерге тигізбей, қағып әкететін салалар көп. Үкіметтің міндеті – олардың өз Отанында табысты еңбек етуіне жағдай жасау.

– *Сұхбат бергеніңіз үшін ризашылық білдіремін. Бірақ айналып өте алмайтын тағы бір сұрағым бар. Сіз неге сұхбатты басқа ақпарат құралдарына емес, баспасөзге бергенді жөн көресіз?*

– Газет-журнал оқу – жас кезімнен қалыптасқан дағды. «Ана тілі» газетін де тұрақты оқып тұрамын. Мен мәліметті телевидение, интернет, әлеуметтік желі сияқты сан алуан ақпарат көздерінен аламын. Бұдан бөлек, күн сайын түрлі мекемеден материалдар келіп түседі. Мен ақпарат кеңістігіндегі үрдістерді жіті қадағалап отырамын. Жазбаша мәтіндердің мән-маңызын төмендетуге болмайды. Мерзімді баспасөз бәрібір мемлекеттік саясаттан хабар беретін маңызды ақпарат көзі болып қала береді.

Менің болмыс-бітімім талдау

жасауға бейім. Сөйлейтін сөздерімнің, мәлімдемелерімнің, тіпті жолдайтын хаттарым мен жеделхаттарымның мәтінін де өзім мұқият қараймын. Мен редакциялағаннан кейін мәтіндер мүлде басқаша болып шығатынына аппарат қызметкерлері әбден үйренген.

Әрине, журналистермен әңгімелесуге өздері бастамашы болып, телеарна тілшілеріне құлшына сұхбат беретін және өздерін жаңалықтардан көргеніне мәз болып отыратын басшылар да бар. Әркімдікі өзіне жөн шығар.

Осы сұхбатты сіздердің басылымдарыңызға беру арқылы еліміздегі журналистиканың тірегі саналатын қазақ тіліндегі медиаға қолдау көрсеткім келді. Биылғы 22 наурызда «Ана тілі» газетінің жарыққа шыққанына 35 жыл толады. Алда келе жатқан мерейлі белестеріңіз құтты болсын! Осы уақытта газет жемісті жолдан өтті, өз ерекшелігі, тұрақты оқырманы бар белді әрі беделді басылымға айналды.

Бүгін біз ең өзекті деген бірталай мәселені ашық талқыладық деп ойлаймын. Жақсы сұхбат болды. Әдетте осындай ауқымды сұхбатта мемлекеттің қызметіне қатысты мұқият ойластырылған әрі маңызды мәселелер айтылады. Өткен жылға қорытынды жасалып, осы жылдың бағыт-бағдары айқындалады.

Шын мәнінде, бұл сұхбатты елге терең ой салу және биылғы жұмысымызға тың серпін беру үшін отандастарыма жолдаған арнайы үндеуім деуге болады.

Әңгімелескен Ерлан ЖҮНІС.

Көне жәдігерлері мол, өткен тарихпен бүгінгі тарихтан сыр шертетін, материалдық және рухани байлықтарды жинақтап, сақтап келе жатқан мәдени ошақ саналатын музейге Қазақстан Республикасының мәдениет және қоғам қайраткері, ағартушы, Қазақ КСРО оқу Министрінің орынбасары, ҚазКСР-інің еңбек сіңірген мұғалімі Қанафин Әуезхан Қанафияұлының құжаттары мен мемлекеттік орден-медальдары, фото-альбомы музей қорына тұрақты қабылданып алынды.

Қанафин Әуезхан Қанафияұлы 1928 жылы 3 қыркүйекте Қарағанды облысы Ақтоғай ауданы, Қаражұмақ қыстағында туған. Ақтоғайдың түлегі. 1945-47 жылдары Қарқаралыдағы Абай атындағы педагогикалық училищесін бітіріп, Алматыдағы Қазақ Мемлекеттік университетіне түседі. 1952 жылы Ақтоғай ауданындағы М.Горький атындағы орта мектепте оқу ісінің меңгерушісі, мектеп директоры болып жұмыс атқарады. 1954 жылы Балқаш қаласындағы Абай атындағы қазақ орта мектебінде еңбек етіп, 1965 жылы Балқаш қалалық оқу білімінің меңгерушісі, 1972-1988 жылдары Қазақ КСР Ағарту министрінің орынбасары болып қызмет істеген. Бірнеше рет қалалық, облыстық кеңестің депутаты болып сайланған.

Қазақ мектептеріндегі оқу-тәрбие жұмыстары мәселелеріне арналған 60-қа жуық ғылыми жұмыстардың үздік түрлері мен бірнеше оқу құралдарын жазған. IX және XI сыныптарға арналған әдебиет хрестоматиясының және бағдарламалардың авторы. Ұлтын сүю, ұлтжанды болу дегенді сөзбен емес ісімен көрсеткен ол 1976 жылы Қазақстан Орталық партия комитетіне дәлелдей жүріп, жоғары кластарда араб тілін енгізді. Республикада тұңғыш рет Н.Келімбетовпен бірігіп Х сынып оқушыларына түрік халықтары әдебиетінің оқулық хрестоматиясын жазып шығарды.

Өнегелі өмір иесі – Әуезхан

1989 жылдан Одақтық дербес зейнеткерлікке шығып, 1989-1995 жылдары Ы. Алтынсарин атындағы Ғылыми-зерттеу педагогикалық институтының аға ғылыми қызметкері болып қызмет жасаған. Қазақ әдебиеті проблемаларына



сәйкес жоғары сыныптарға арнап қазақ әдебиетін тереңдетіп оқытудың жаңа бағдарламасын құрастырған. Еңбегі жоғары бағаланып әр жылдары түрлі наградалармен марапатталған. Атап айтсақ Еңбек Қызыл Ту, «Құрмет Белгісі» ордендерімен және үкімет медальдарының иегері. Ұлағатты ұстаз Бүкілодақтық ауылшаруашылығы көрмесінің «Алтын медалінің», Ы.Алтынсарин, Н.К.Крупская атындағы медальдардың иегері. Сондай-ақ, «Қазақстан Республикасына еңбегі сіңген мұғалімі» құрметті атағы және 1998 жылы «Ақтоғай ауданының Құрметті азаматы» атағы берілді.

Қанафин Әуезханның әпкесі Нұрханның қызы (Қ.Әуезханның жиені) педагогика ғылымдарының кандидаты, доцент Майра Хасенқызы 2022 жылы жаз айында аудандық музейге келіп музей басшысымен кездескен болатын. Музейден Қанафин Әуезханның

Марокко елінен әкелінген ауданның 60-жылдығына сыйға тартқан Шараяғы ғана бар екенін көріп, Республикалық деңгейде білім саласының дамуына саналы ғұмырын сарп еткен аптал азаматтың туған жеріндегі музейде тұрған деректердің аздығын ескере отырып, сол уақыттан бастап бүгінгі күнге дейін жан-жаққа шығып толық құжаттарын, мемлекеттік орден-медальдарын, марапаттарын, фото суреттерін жинақтап, фото-альбомдар жасап, туған-туысқандарының үлкейтілген суреттерін шығарып музейге сыйға беру арқылы музей қорын құнды жәдігерлермен толықтыра

түсті.

Музей ұжымы атынан педагогика ғылымдарының кандидаты, доцент Майра Хасенқызына алғысымызды айта отырып, отбасына амандық, деніне саулық, қажымас қайрат тілейміз! Өнегелі өмірімен кейінгі буынға үлгі болған қарияның артында қалдырған мол мұрасы еш уақытта ұмытылмас қазынаға айналмақ.

Ә. Сейсенбаева,
Ақтоғай археологиялық-этнографиялық музейінің аға ғылыми қызметкері.

Хабарландыру

Қазақстан Республикасының «Қоғамдық кеңестер туралы» 2015 жылғы 2 қарашадағы Заңының негізінде және Қазақстан Республикасының Ақпарат және қоғамдық даму министрінің 2021 жылғы 26 ақпандағы №69 қаулысымен бекітілген Қоғамдық кеңестер туралы үлгілік ережесіне сәйкес Ақтоғай аудандық мәслихаты Ақтоғай ауданының қоғамдық кеңесінің құрамын қалыптастыру бойынша жұмыс тобының мүшелерін іріктеу бойынша конкурс өткізілетінін, сонымен қатар, байқаушылар тізімін қалыптастыратынын хабарлайды.

Көрсетілген кезеңде коммерциялық емес ұйымдар және азаматтар Ақтоғай аудандық мәслихатына Ақтоғай ауданының Қоғамдық кеңесінің құрамын қалыптастыру бойынша Жұмыс тобының құрамына кандидатуралар бойынша ұсыныстарды жазбаша түрде жолдайды.

Жұмыс тобына кандидаттарға қойылатын талаптар («Қоғамдық кеңестер туралы» ҚР Заңының 10 бабы):

1. Қазақстан Республикасының он сегіз жасқа толған, сондай-ақ жергілікті деңгейде – тиісті әкімшілік-аумақтық бірлік шегінде тұрақты тұратын азаматы жұмыс тобы мүшелігіне кандидат бола алады.

Жұмыс тобы мүшелігіне кандидаттың:

1) Қазақстан Республикасының заңнамасында белгіленген тәртіппен жойылмаған немесе алынбаған сотталғандығы болмауға;

2) сот заңда белгіленген тәртіппен сыбайлас жемқорлық қылмыс және (немесе) сыбайлас жемқорлық құқық бұзушылық жасауда кінәлі деп танымаған болуға;

3) психикалық, мінез-құлықтық, оның ішінде психикаға белсенді әсер ететін заттарды тұтынуға байланысты бұзылушылықтардың (аурулардың) себебі бойынша психикалық денсаулық саласында медициналық көмек көрсететін ұйымдарда есепте тұрмауға тиіс.

Жұмыс тобы мүшесін іріктеу бойынша конкурсқа ұсынылатын құ-

жаттар тізімі:

1) кандидатураны жұмыс тобының құрамына ұсыну туралы коммерциялық емес ұйымның жазбаша ұсынысы және (немесе) азаматтың өтініші (1 қосымшаға сәйкес);

2) өмірбаян деректері көрсетіле отырып, кандидаттың кәсіптік және (немесе) қоғамдық қызметі туралы мәліметтер;

3) сотталғандығының болуы не болмауы туралы анықтама;

4) психикалық, мінез-құлықтық, оның ішінде психикаға белсенді әсер ететін заттарды тұтынуға байланысты бұзылушылықтардың (аурулардың) болуы не болмауы туралы анықтама;

5) кандидаттың дербес деректерін жинауға, өңдеуге, таратуға және жариялауға келісімді жібереді.

Сонымен қатар, кандидатуралардың назарын Ақтоғай аудандық мәслихат төрағасының өкімімен жұмыс тобының сандық құрамы бекітілгеніне аударамыз.

– Мемлекеттік органнан - 2 өкіл

– Коммерциялық емес ұйымдар мен азаматтардан - 4 өкіл.

Байқаушы ретінде жұмыс тобының отырысына қатысу үшін, байқаушы болғысы келетін тұлға осы хабарламаның 2 қосымшасына сәйкес үлгідегі Қоғамдық кеңесті құру бойынша жұмыс тобының мүшелерін іріктеу бойынша конкурсына байқаушы ретінде қатысу туралы өтінішін аудандық мәслихатқа немесе оның электронды мекен-жайына жібереді.

Жұмыс тобының мүшелігіне іріктеу, сонымен қатар, байқаушыларды қалыптастыру бойынша ұсыныстар жұмыс күндері 2025 жылдың 10-16 қаңтар аралығында қабылданады.

Конкурсқа құжат мына мекен-жай бойынша қабылданады: 100200 Ақтоғай ауылы, Бөкейхан даңғылы, 4 үй «Ақтоғай ауданының мәслихат аппараты» ММ, № 12 кабинет, сонымен бірге aktogai_maslihat@mail.ru электронды мекен-жайында қабылданады.

«Ақтоғай ауданының мәслихат аппараты» ММ.

Объявление

На основании Закона Республики Казахстан от 2 ноября 2015 года №383-V» Об общественных советах», в соответствии с Приказом Министра информации и общественного развития РК от 26 февраля 2021 года № 69 «Об утверждении Типового положения об Общественном совете» Актогайский районный маслихат объявляет о проведении конкурса по отбору членов рабочей группы по формированию состава Общественного совета Актогайского района, а также по формированию списка наблюдателей.

В указанный период некоммерческие организации и граждане направляют в Актогайский районный маслихат в письменном виде предложения по кандидатурам в состав рабочей группы по формированию состава Общественного совета Актогайского района.

Требования к кандидатам в рабочую группу (ст. 10 Закона РК» Об общественных советах"):

1. Кандидатом в члены рабочей группы может быть гражданин Республики Казахстан, достигший восемнадцати лет, а также на местном уровне – постоянно проживающий в пределах соответствующей административно-территориальной единицы.

Кандидат в члены рабочей группы не должен:

1) иметь судимость, которая не погашена или не снята в установленном законодательством Республики Казахстан порядке;

2) быть в установленном законом порядке признанным судом виновным в совершении коррупционного преступления и (или) коррупционного правонарушения;

3) состоять на учете в организациях, оказывающих медицинскую помощь в области психического здоровья, по поводу психических, поведенческих расстройств (заболеваний), в том числе связанных с употреблением психоактивных веществ.

Перечень документов, представляемых на конкурс по избранию члена

рабочей группы:

1) письменное предложение некоммерческой организации и (или) заявление гражданина о выдвижении кандидатуры в состав рабочей группы (в соответствии к приложению 1) ;

2) сведения о профессиональной и (или) общественной деятельности кандидата с указанием автобиографических данных;

3) справка о наличии либо отсутствии судимости;

4) справка о наличии либо отсутствии психических, поведенческих расстройств (заболеваний), в том числе связанных с употреблением психоактивных веществ;

5) согласие на сбор, обработку, распространение и публикацию персональных данных кандидата.

Также обращаем внимание кандидатов на то, что распоряжением председателя Актогайского районного маслихата утвержден количественный состав рабочей группы.

– От государственного органа-2 представителя

– От некоммерческих организаций и граждан - 4 представителя.

Для участия в заседании рабочей группы в качестве наблюдателя лицо, желающее стать наблюдателем, направляет в районный маслихат или на его электронный адрес заявление об участии в качестве наблюдателя в конкурсе по избранию членов рабочей группы по созданию Общественного совета по форме согласно приложению 2 к настоящему объявлению.

Предложения по отбору членов рабочей группы, а также наблюдателей принимаются в рабочие дни с 10 по 16 января 2025 года.

На конкурс принимаются документы по адресу: 100200, село Актогай, проспект Бокейхана, дом 4 ГУ "аппарат маслихата Актогайского района", кабинет №12, а также по электронному адресу aktogai_maslihat@mail.ru.

ГУ «Аппарат маслихата Актогайского района».

ЖРВИ ЖӘНЕ ТҰМАУДЫҢ АЛДЫН АЛУ

ЖРВИ (жіті және респираторлық вирустық инфекциялар) және тұмау — ауа-тамшылы жолмен таралатын инфекциялық ауру

ҚАЛАЙ ЖРВИ МЕН ТҰМАУДАН ҚОРҒАНАМЫЗ?

ВАКЦИНАЦИЯ

Тұмаудан қорғандың ең сенімді және тиімді тәсілі — вакцинация!

ИММУНОТРОПИЯЛЫҚ ПРЕПАРАТТАР

Иммунотропиялық препараттар — дәрумендер, иммуномодуляторлар иммунитетті көтереді. Оларды нұсқаулығы бойынша қабылдаңыз.

ЖЕРГІЛІКТІ ИММУНІТЕТТІ ҚОЛДАУ

Жеке гигиенаны сақтау
Жеке қорғаныс заттарын пайдалану
Науқастармен байланыста болмау
Дұрыс тамақтану қағидаларын сақтау
Ұйқы және демалыс режимін сақтау

ОСЫ ҚАРАПАЙЫМ ЕРЕЖЕЛЕРДІ ҚОЛДАНЫП, ДЕНСАУЛЫҒЫҢЫЗДЫ САҚТАҢЫЗ!

Еске алу

Асық атып, асау тайға мінгесіп, бала кезден бірге өскен құрдасымыз **Тәжібаев Жанболатты** сағынышпен еске аламыз. Арамызда жүрсе қаңтар айының 21 күні Жанболаттың 50 жасқа толған мерейтойын арқа-жарқа болып тойлар едік. Тағдырдың жазуымен бұл орындалмас арман болып қалды. Жүзінен нұр, күлкісінен мейірім төгіліп тұратын досымыздан қапияда айырыламыз деп ойламаппыз. Маңдайына қамшының сабындай қысқа ғұмыр жазылған екен. Қолдан келер қайран жоқ. Десек те

«Орнында бар оңалар» деген. Артында қалған балалары мен сүйікті жары Жайнагүлге көрмеген қызықтарын көруге Аллам нәсіп етсін. Ауданымыздың өнер саласына өзіндік үлес қосқан, сегіз қырлы, жүрген жерін думандатып жүретін осынау асыл жанды қимастық пен сағыныш сезіммен еске алып, тыныстаған мекенің жайлы, топырағың мамық, жатқан жерің жарық, жаның жәннатта болсын деп рухына дұға бағыштаймыз.

Достарың келді жабығып,
Еске алып сені сағынып.
Топырағың торқа боп,
Жай тапсын жаның мәңгілік.

Еске алушылар: Сайран-Бота, Ермек-Меруерт, Алтай-Жанерке, Абзал-Жазира, Қанат-Нұрила, Мамыр-Гүлмира, Зәмзагүл, Жандос-Анар, Надира.

1974 жылы мектеп бітірушілер – Сағат, Бауыржан, Мұрат, Берікбол, Тәбарак, Исбек, Қарлығаш К, Сара, Ркен, Қауан және Жұмағалының отбастары бала шақтан бірге өскен ақкөңіл де аяулы досымыз, Жидебай селолық округының тұрғыны **Ибраев Серік Қуатбекұлының** дүниеден өткеніне байланысты, марқұмның жанұясына, жақындарына қайғырып көңіл айтады.

«Аққыз» бөбекжайы» ұжымы осы ұжымның тәрбиешісі Ағыбаева Гүлмираға жолдасы **Түсіпбеков Инабаттың** кіші қызметкер Мадишова Гүлмираға анасы **Нұрахметова Гүлжамалдың** тәрбиеші Бадигулова Қанатгүлге әкесі **Бадигулов Шайырбектің** қайтыс болуына байланысты қайғыларына ортақтасып, көңіл айтады.

Қазақстан Республикасының 2025 жылы аталып өтілетін және еске алатын күндер күнтізбесі

1 наурыз – Қазақстан халқы Ассамблеясының (ҚХА) құрылғанына 30 жыл (1995 жыл).

30 тамыз – Қазақстан Республикасы Конституциясының қабылданғанына 30 жыл (1995 ж.).

12 желтоқсан – Президенттің "Қазақстан Республикасының мемлекеттік наградалары туралы" жарлығының шығуына 30 жыл (1995 ж.).

25 қазан – Қазақ Кеңестік Социалистік Республикасының мемлекеттік егемендігі туралы Декларациясының қабылданғанына 35 жыл (1990 ж.).

2 маусым – Байқоңыр ғарыш алаңының құрылғанына 70 жыл (1955 ж.).

1 қазан – Теміртау қаласының құрылғанына 80 жыл (1945).

9 мамыр – Жеңіс күні, 1941-1945 жылдардағы Ұлы Отан соғысының аяқталғанына 80 жыл.

29 наурыз – Журналист, сықақшы Көпен Әмірбектің туғанына 75 жыл (1950 - 2022 жж.).

26 мамыр – Кино және театр актері Айдос Жұмаділдәұлы Бектеміровтың туғанына 75 жыл (1950 ж.).

7 шілде – Өнші, Қазақстанның еңбек сіңірген әртісі Ақжол Нұсқабекұлы Мейірбековтің туғанына 75 жыл (1950 - 2023 жж.).

22 қыркүйек – Жазушылар одағының мүшесі, ақын Несіпбек Айтұлы (Айтов Несіпбек Тұрысбекұлы) туғанына 75 жыл (1950-2023 жж.).

9 ақпан – Актер, Қазақстанның халық әртісі Василий Федорович Корниенконың туғанына 100 жыл (1925 - 1994 ж.).

2 наурыз – Ғалым Шора Шамғалиұлы Сарыбаевтің туғанына 100 жыл (1925-2018 жж.).

3 наурыз – Қазақ жазушысы Жұмабай Тәшеновтың туғанына 100 жыл (1925-1994 жж.).

21 наурыз – Қазақ ақыны Қуандық Төлегенұлы Шаңғытбаевтың туғанына 100 жыл (1925-2001 жж.).

23 наурыз – Ғалым-металлург, техника ғылымдарының докторы, Қазақстан Республикасы ҰҒА академигі Евней Арыстанұлы Бөкетовтың туғанына 100 жыл (1925-1983 жж.).

(Материал ғаламтордан алынды).

Құттықтаймыз!



Құрметті ағамыз **Бауыржан Несіпбекұлы** 60 жасқа толған мерей-жасымен құттықтаймыз. Асқаралы жастың думаны мен қызығы сізді бақыт пен шаттыққа бөлеп, әрбір күн жанға шуақ сыйлар қуаныш әкелсін. Денсаулығыңыз мықты, өмір жасыңыз

ұзақ болсын. Отбасыңызға ырыс пен ынтымақ, бақыт пен береке тілейміз.

Құтты болсын қуанышты күніңіз,

Бақытты боп шаттық өмір сүріңіз.

Алғыстың да асқарына жеттіңіз,

Енді жүзге құлаш сермеп шығыңыз.

Мереке күн нұрға толсын жүзіңіз,

Қуаныңыз, шаттаныңыз, күліңіз.

Бала-шаға қызығына кенеліп,

Ортамызда аман-есен жүріңіз!

Ізгі тілекпен: Қайыр-Қымбат, жиендері – Мақсат, Бекзат-Нұржаусын, Айбат-Бақытгүл, Олжас-Ақбота.

Құттықтаймыз!



Қызыларай ауылының тумасы, ұлағатты ұстаз **Амангелді Абдразақов !** Сізді зейнеткерлік жасыңызбен шын жүректен құттықтаймыз!

Ұстаздың еңбегі шәкірттерінің шыққан биігімен өлшенсе, өзіңізден дәріс алған оқушылар бүгінгі күні сізді мақтан етеді.

Әріптестер арасында адал еңбегіңізбен, аржарқын мінезіңізбен сый-құрметке бөленіп келесіз. Еткен еңбектің еленгені кімге де болса қуаныш, көңілге үлкен медет. Қуанышыңыз құтты болсын. Еңбек демалысыңыздың әр күні шалқыған шаттыққа, бақытқа толсын. Өмір жолыңыз ұзақ болып, көрген бейнетіңіздің зейнеті жүз есе, мың есе болып денсаулық, бақыт, байлық алып келсін.

63 – зейнетті жас ер үшін,

Еңбегіңіз еселенсін ел үшін.

Әлі талай қызықтарға кенеліп,

Бұл өмірдің көріңіз тек жеңісін.

Ізгі тілекпен: Қызыларай мектебінің ұжымы.

Ақтоғай ауылының тұрғыны, әріптесіміз

Дана Әбдіразақованы

60 жасқа толған мерей-жасымен шын жүректен құттықтаймыз.

Сізді шын жүректен құттықтай отырып, әріптестеріңіздің ізгі көңілінен шыққан ақ тілегімізді жолдаймыз.

Сізді білікті де білгір, тәжірибелі де озық, сыйлы да беделді маман ретінде құрмет тұтамыз. Осы қуанышты күні сізге ұзақ өмір, зор денсаулық, баянды бақыт тілейміз. Көңіліңіз ғұмыр бойы көтеріңкі болып, өмір айдынында қайғы-мұңды білмей, еркін жүзе беріңіз. Отбасыңыздан береке-бірлік, басыңыздан бақ-дәулет таймай, аңсаған армандарыңыздың асуына жете беруіңізге тілектеспіз.

Мерейтойда нұрға толсын жүзіңіз,

Қуаныңыз, шаттаныңыз, күліңіз.

Бала-шаға қызығына кенеліп,

Ортамызда аман-есен жүріңіз!

Ізгі ниетпен: Зәуреш, Саулет, Жазира, Айнұр Жаңагүл, Сарқыт.



Құрметті көршіміз **Дана Әбдіразақова!**

Сізді 60 жасқа толған мерейтойыңызбен құттықтаймыз! Сіз алғыс атты асқар шыңның асуына шығып отырсыз. Осы күні сізге шын ниетпен зор денсаулық, отбасына амандық, шаңырағыңызға шаттық, дастарханыңызға береке тілейміз. Бала-шағаңыздың қызығын қызықтап, немерелеріңіздің шат күлкісіне тоймай аман-сау жүре беріңіз. Сіз талай жылдан бері ишпалы қолыңызбен, жылы сөзіңізбен алдыңызға келген науқастың жанына, тәніне саулық сыйлап, алғысын алдыңыз. Өміріңіз бақытқа бөленіп, әлі талай айтулы белестерді бағындырып, биіктерден көріне беруіңізге тілектеспіз.

Жұлдызың жалғассын ғасырларға, Ардақты дос, асыл жан, дара тұлға. Қуаныш құтты болып, бақ дарысын, Өмірің толы болып шуақ нұрға. Ақ тілекпен: көршілерің – Ғайныш, Шәмел, Серік-Зайдагүл, Есен, Шынар, Мейрам-Жанна, Гүлнар, Кәукербек-Гүля, Талғат-Жанар, Аңсаған-Есенгүл.

Жұлдызың жалғассын ғасырларға,

Ардақты дос, асыл жан, дара тұлға.

Қуаныш құтты болып, бақ дарысын,

Өмірің толы болып шуақ нұрға.

Ақ тілекпен: көршілерің – Ғайныш, Шәмел, Серік-Зайдагүл, Есен, Шынар, Мейрам-Жанна, Гүлнар, Кәукербек-Гүля, Талғат-Жанар, Аңсаған-Есенгүл.

Құттықтаймыз!

Құрметті әріптесіміз **Әбдіразақова Дана Армияқызы!**

Сізді адам өмірінің айтулы белесі – 60 жасқа толған мерейтойыңызбен шын жүректен құттықтаймыз!

60 жас – адамның кемеліне келіп, алдыңғы толқын әпкелерінің ізін

басып, кейінгі толқын сіңділері құрмет көрсетіп, ілтипат танытатын, бала өсіріп, құда-жекжатты болып, немере сүйіп, өрісі кеңейіп, өркені өскен беделді кезең. Мерейлі жасқа келген адам жанының арашашысы, ақхалатты абзал жанға деніңізге саулық, отбасыңызға амандық, еңбекте тың табыстар мен өмірдің асқақ абыройын, ағайын-туыс, құда-жекжат, көрші-қолаң құрметіне бөленіп жүре беріңіз деп тілейміз.

60 деген шығатын бір асқар шың,

Тілейміз жақсылықты басыңа мың.

Жылыта бер жан-жағыңды жылуыңмен,

Шалмасын жүзіңізді ешқашан шалмасын мұң.

Ізгі тілекпен: Ардақ, Әлихан, Мақпал, Айна, Баян, Дидар, Жансая, Маржан, Анар, Меруерт, Айнагүл, Айжан, Алина.

Ақтоғай ауылының тұрғыны **Әбдіразақова Дананы** 60 жасқа толған мерейтойымен шын жүректен құттықтаймыз.

Сізге ең бастысы зор денсаулық, отбасыңызға амандық, шаңырағыңызға ырыс байлығын, балаларыңыздың қызық-қуанышын тілейміз. Туған-туыс, дос-жарандарыңыздың ортасында ойнап-күліп, көңіліңіз шаттық пен қуанышқа толсын. Жүзіңіз күндей күліп, жүрегіңіз жаздай жайнап, өз ортаңыздың қадірлісі, сыйлысы болып берекелі де мерекелі ұзақ өмір сүруіңізге тілектеспіз.

Қызыққа әрі қарай кенеле бер,

Қажымай, жүзге жетіп, немере сүй.

Жан-жағыңа сая болып көлеңкеңмен

Мәуелі бәйтеректей көгере бер.

Ақ тілекпен: Мақат, Саят, Рымбек, Ғабит, Дулат К, Дулат М, Қайрат, Еламанның отбастары.



Құрметті **Әбдіразақова Дана!**

Сізді өміріңіздің бір белесі – 60 жасқа толған мерейтойыңызбен шын жүректен құттықтаймыз. Осы айтулы мерекенің күні сізге зор денсаулық, отбасыңызға амандық, қажымас қайрат, берекелі де мерекелі ұзақ өмір тілейміз.

Шаңырағыңызда шаттық пен қуаныш көп болсын, бала-шаға, немерелеріңіздің қызығына тоймай, Алланың назарында, бақыттың базарында болғайсыз деген ізгі тілегімізді білдіреміз. Арайлап атқан әрбір таң сізге тек қана шаттық пен қуаныш әкелсін!

Құтты болсын мерекелі тойыңыз,

Орындалсын арман-мақсат, ойыңыз.

Әулетіңіздің құрметіне бөленіп,

Әрқашанда биік төрде болыңыз.

Ақ тілекпен: Болат-Күміс, Коля-Замзагүл, Қайрат-Раушан, Болат-Бақша, Асқар, Төлеу, Мейіргүл, Мейрамгүл, Маржан.



Құрылтайшы: ЕЛЕУСИЗОВА ГҮЛНАР МЕТАЕВНА

Редактор: Г.ЕЛЕУСИЗОВА

Меншік иесі: “Ақтоғай ажары” газеті редакциясы ЖШС

Тіркеу куәлігі: №KZ94VPY00019192. (Қазақстан Республикасы ақпарат және даму Министрлігі 2020 жылы 10 қаңтарында берілген)

Газет аптасына 1 рет шығады

Газет редакцияның компьютер орталығында қатталып, Қарағанды қаласында «Арқо» баспаханасы ЖШС-де басылады. Сәтбаев көшесі, 15-үй

Мақала авторларының пікірі газеттің көзқарасын білдірмейді. Таралымы 912 дана



Мекен-жайымыз: 100200, Ақтоғай ауылы, Абай көшесі, №1 а үй. Телефондар: редактор: 2-18-81, тілшілер, компьютер орталығы: 2-15-39

Электрондық пошта aktogai_red@mail.ru

Газетке А4 форматты 3 беттен асқан материалдар қабылданбайды.